

出使美日秘國日記

出使美日祕雀日記

四月初一日 小兩竟日

中正梅律師阿士頓利亞頓來見梅律師言請電達總理衙門此例須待議院開時由議紳再議以有上議紳可六之請總統已將案牘發交議院自必再議故也阿士頓言中國一聽客之所爲而毫無抵制近日議紳之持公論者皆屈而不伸以後不敢昌言多奪氣矣雖有再議之舉恐難期其秉公中國若照美國新例卽令美人之在中國者皆領照註冊皆由中國地方官判案此美國所不能駁而各國皆以爲然者似可照行因答曰我國向恥違約而以柔遠爲心故不欲行容當以此意轉達於總理衙門利亞頓

言總察院既不敢反議院之議公使宜照美外部令其暫緩行例以俟十月開議院時再議因答日照會緩行苛例前兩月已履行文外部外部已有覆文且我總理衙門先已照會田貝轉電外部俟新使到美再議外部所覆之意亦許緩矣似亦不必重申仍俟三思而行可也談久而散巳酉正矣

四月初二日晴

謁外部本擬面詰新例而外部葛禮山已正專函來請因卽趨赴值英公使先有事見因待至午正見面將欲有言外部先言謂新總統先時示意緩行新例不照相不覓保華人不領照者亦不拘拿本示以廢例之意方謂總察院必以廢爲事矣不意有附前總

統者居然批行總統甚歉仄不以爲然而又無廢例之權昨日傳各部員相商已示意仍不拘迫華人領照以表兩國和好之意因答曰貴大臣所言如此但恐各省官員藉此蹂躪華人則多事矣外部言斷不縱令各省蹂躪華人但中國亦勿輕動使美民之寓華者或遭焚殺請電政府因答曰因必電政府保護美民美民之在中國者因當力任保護華民之在美國者貴大臣當力任保護二人分任不得推諉異言外部欣然允許且密告曰此例總統必示意議院於冬初開院時必當議廢不但如貴大臣所欲且有喜出望外者惟勿漏泄耳談久辭退當卽電達總署云謁外部外部傳總統意仍緩行例且求保護寓華美人又發書二函分呈總署

北洋

四月初三日晴

金山來電云美官公論已見例難辦必緩行現屬律司立新案再與堅持必轉華商乞轉電毅爭民安靖黎當卽覆電云昨日已電總署 三月二十八日伯林來電言德主謂議院不允添兵不過以籌餉維艱之故今擬整頓煙葉稅項卽可補庫欸之不足議院自無所藉口云 因嘗查美國煙酒兩稅收欸甚鉅其稅則亦甚重壬辰之春曾赴古巴查古巴捲煙之業計千餘家美國上議紳士丹佛言金山一省設酒肆者計四千六百餘家亦可見泰西人之嗜好矣泰西煙酒其價甚費不可以中國之價例之出使人員

之尙西洋煙酒者每日所費可抵中人十口衣食因譏之洋人之知大體者亦深惡之故泰西各國煙酒之稅至爲繁重非必好爲苛征亦冀以節斯人之嗜好耳德國整頓煙葉一項之稅卽足以敷增兵之費驟而聞之斷不信也親歷者自知之

初四日晴

已初金山商董來電云察院礙議院情面五員批行三員批否例定行僑氓惶急此間心力已竭非列憲設法難挽現按例卽押驅民等以有財產二千萬電戶部存案教會防報復求緩總統有歉心以驅載須鉅資有難意惟國例成工黨囂恐難阻若中國教爭俾有詞決可挽此例正大官商皆不服屬華人再辨現已擬案再

駁值賽會萬國皆切窺中美交涉之事能急持諒不敢肆情急籲
乞謹再冒瀆罪甚工商叩乞已正總理衙門來電云任既回華勿
再給資田員在此中國并無不悅告知外部并探其間及之意支
當卽發德律風至外部衙門訂與外部大臣相見時刻卽據覆云
外部已出門俟回衙門定奪中正又接總理衙門電云尊電以察
院羅基利仍行新例昨華商言謁外部外部傳總統意緩行例確
否卽電覆察院判語速譯寄豪又接外部德律風言明日午正相
見

初五日晴

江海關來電云二萬庫平緝 午正赴外部衙門見外部大臣葛

禮山因先言曰貴大臣所詢中國是否悅田貝及傳總統之意言
察院雖批行例仍擬緩行并保護華民又請中國亦保護美民因
均已電達茲接總理衙門覆電云云爲外部誦之葛禮山答曰田
貝出使已八年詢中國之悅與否者所以商定去留也卽此見美
與中國和好之意總統不以禁工例爲然而察院自行其意然總
統無廢例之權美創國例議院創例故須俟冬初開議院時再議
今年議院已定早開故屬外部戶部緩行此例仍護華人以表兩
國和好之意又恐中國不鑒此忱成有決裂形迹則誤大局故請
電中國政府也因答曰以前布連好爲欺飾之語故總理衙門懲
前愆後屬詢貴總統貴大臣之意確否庶彼此推心置腹以期不

至決裂葛禮山曰余非布連比也現在之所行者如不照相不覓保不領照者亦不拘拿已見端倪議院之開不過百三十日耳期非遠也他日請證余言欲先言之未必見信且亦不便先言總之觀余所行可耳因謝之遂辭出

初六日 晴酉正雨

三月二十九日伯林來電言德國大軍擬於交秋操演擇於附近法國疆界各邊省大耀軍容較之以前尤爲壯盛德主已函達奧義兩國之君及英世子請屆期臨覽云 因謹按前侍郎殷兆鏞上疏言始終不忘戰今於歐洲各強國見之也夫所謂不忘戰者乃蒐軍實講武事汰惰弱演陣法考求中外強弱情形非僅以備

武員具兵額而已也亦非欲開釁於鄰國也泰西各國常覘敵國之勢以爲向背之機卽商書兼弱攻昧之義也卽兵書攻瑕不攻堅之機也往年粵捻回匪之亂其攻城掠地凡飽所欲而颺去者無不復來凡被創而逃者決不再至凡於庸將疲卒所屯之處則必趨之凡於洲淮霆軍所來之路則必避之雖擾攘二十年而前後一轍焉歐洲各國無論德與俄法相爲敵讎卽與德聯盟之奧義二邦二十年前卽有戰事我強則讎者亦親我弱則向者亦背鑿乎鼓之軒乎舞之精華已竭蹙裳去之德主共知之矣其耀兵於法界而請奧義之君憑軾而觀匪特可遏法人報怨之心并可堅奧義聯盟之局其不忘戰正所以止戰焉

初七日晴

歐洲各國增兵耀武相持不下以致庫欸支絀而終不敢罷兵者恐敵乘其懈也教王蓄目傷心深思補救之術擬約會各國息爭戰而講農桑以爲各國如以爭地爲心欲其不爭莫如於彼此交界地方留一甌脫無論何國不得在此用武或可不啟爭端云

因按此亦禁鴉片之類徒託空言耳禹會諸侯於塗山執玉帛者萬國至於東周而存者無數十焉彼時有天子之控制猶不能禁其并吞也秦西數百年間元世祖曾混一之羅馬亦曾混一之乃不逾時而卽以力自雄各王其地此古時不能不爭之明驗也中國粵捻回匪相繼爲亂幾徧天下中間尙有外侮乘之此近四十

年中事也泰西南北花旗德法俄土智祕之戰殺人近二百萬此近三十年中事也宋向戌爲弭兵之會當時卽有子罕之論魯莒之爭彼時晉楚猶可駕馭列邦今強國非止一二矣度英俄之勢能駕馭德法奧義四國乎竊以爲當今之世而欲偃武勢必不能惟有黽勉自強使敵國不敢犯焉創興製造使軍械不外求焉開濬利源使物產不棄地焉講求交涉使金銀不漏卮焉亦治安之策而人力所能爲者爾

初八日晴

初一日羅馬來電言天主教王向居羅馬從前義國政府深惡教王其待之也無異囚虜教王亦自斂飭通諭入教之徒勿干涉義

國教事如逢公舉議紳凡入教者不操選舉之權亦不入選舉之列由來久矣近教王以教勢日衰欲准入教者與舉議紳或充當議紳以冀教勢復振義廷知之卽屬議院立例不准教士干預國事以限制之已成議矣 因於此而歎義國之善制教士也俄德之制教士因嘗疏陳之矣墨西哥之教士作奸因又詳論之矣教王盤踞義都較墨國之遠隔重洋其限制之難易顯而易見乃難者易而易者難於此可知兩國之得失焉夫權之所在可以制人而人不能制中國之入教者皆倚教士有袒護之權也揣其用心與墨國之民一轍因願仿義廷之法以制之凡入教者但與僕隸同科則從之者少矣或曰是不畏決裂乎 因謂美國之入天主教

者不入選舉未聞決裂也或曰中美二國勢不同也因謂中國之制教也弊在暴躁故釀禍階等於僕隸不齒而已非將燔逐之也外國之於兇犯但治以應得之罪均無縛拽鞭笞之刑中國每以暴躁僨事啟釁啟釁之後又以賠卹示弱必使官民咸知此意其庶幾不輕舉驟發乎

初九日晴

中正總署來電內開電悅外部允緩例保工所緩所保有無年月條款或僅空言卽電復本署無不堅持駁論希傳諭金山華商佳查前此阿力根省之民黨大會於工廠議行章程二款一謂該省總督噴拿治譏美總統與外部大臣同謀助華所譏甚是一係怨

總統外部大臣之失策又述總督噴拿治論及華人不領照之故以爲必係總統等與中國公使私相商定否則如總統等決意欲行新例華人安敢不遵而何以不領照註冊也是處初聞阿司多利埠華人所黏六大會館告示美民不知所措設有不虞將惟總統是問總統等不欲行例顯係中國公使導之使然而中國公使亦既獲罪亦可控告也云云 因查美國工黨之勢日盛官紳徇之者多今總統外部戶部內顧中美之約而外懼工黨之勢不得已而緩行例以待議院再議此其用心甚苦而可共諒若必迫之使其昌言不准行例是顯與工黨爲讎美爲民主之國總統斷不能與民爭勝且議院已袒工黨而總察院又袒之總統部員已成

孤立度勢量力總統決不敢與通國相違似宜從其所請以俟議院轉機爲妥未便迫之使變計也梅律師以爲然遂止

初十日晴

電總理衙門云外部顧邦交而畏衆口屢求勿泄難責實據現安靖因 朝鮮代辦使臣李采淵偕赴會之員鄭顯敏來謁因詢以朝鮮鬧教之案知已無事又詢朝鮮以歲歉禁五穀出口此內政也日本何以齟齬又何以索賠朝鮮又何以竟賠銀十萬圓美外部言之鑿鑿誠有其事否李采淵答言實有賠銀之事至何故齟齬尙未知其詳細也談久而去 因按日本之魚肉朝鮮也由來久矣明季平秀吉入寇據其國都非中國派兵爲之奪回朝鮮幾

於不祀近數十年來又脅以立約大院君之家難日本樂禍幸災
幸賴中國兵力弭患蓋其欲肆志於朝鮮久矣因又聞俄君近日
派其儲爲西比里亞鐵路監督鄭重其事以冀早日竣工其通籌
東三省朝鮮固顯而易見也因又聞俄世子遊歷日本被刺之事
日本內不自安宣言於衆謂異日俄有事於朝鮮日本必處局外
則是日本與朝鮮爲比隣而不與朝鮮爲脣齒也因以爲日本非
但不與脣齒相依且必效德奧之於波蘭願與俄分裂其地耳明
者見事於未然此之不可不早計者也

十一日 晴夜雨

答拜朝鮮代辦及赴會之員 律師利亞頓來見梅律師攜到戶

部章程卽飭繙譯譯出其文云本部於本月四號諭飭各員凡華人有不遵一千八百九十二年五月五號所行禁止華人來美各例欸者非有後諭一概不准拘拿等因在案現在凡例得在美之華人未經照蓋力例第六欸領照者仍須照前本月四號諭飭遵辦又查華工違背一千八百八十四年七月五號增修一千八百八十二年五月六號之例與一千八百八十八年十一月一號所行之例來美者爲數甚多其中係冒充華商并冒他項人等及由他國偷入美境之人甚衆自應照一千八百九十二年五月五號禁例之第一欸第二欸第三欸第四欸第五欸此各欸者均係仍前一千八百八十二年八月十四年八十八年限禁華工來美之舊例

載明例應審訊監禁載回按例不准在美居住之華工者自應照舊例辦理於凡華工來美不能將例得來美之據相示者自宜拘拿查辦特此通飭此文由梅律師交到梅律師云前半段係聲明不行蓋力領照註冊拘拿之例後半段係聲明仍照舊例於由英屬卡拿大及墨西哥國偷入美境者按例辦理蓋新例之第一款至第五款實重中壬午甲申戊子限禁華工之舊例故戶部以此拋塞而第六款則係蓋力特創最爲苛虐有礙居美之華人此款不行則蓋力之例實已不行但以已經上下議院議准故不敢顯言廢棄耳居美華人可無事矣因仍屬梅律師而見戶部大臣愷來爾詢其果否的確然後電達總署

十二日 晴子刻雨辰霽夜雨

已初梅律師來見言於午初至戶部謁戶部大臣愷來爾據云出門待久查諸總辦始知戶部大臣實未出門因近日來訪者過多故託辭避客也遂請見梅律師曰中國公使前兩日接總理衙門之電詢問領照註冊拘拿之例是否緩行如何緩法急須覆電愷來爾云章程已刊出矣蓋力所定之例前五款係聲明舊例但禁由鄰國之境而偷入美境者於現在居美之華人無傷也其第六款於已居美之華人迫其領照註冊否則監禁拘拿中國政府致意美使田貝中國公使於上月照會請緩行例保護華人前來外部商之總統律政部戶部已電覆田貝及中國公使必保護華人

矣以前本已電飭各省不准迫華人以領照及監禁拘拿各節適因總察院意見各歧因恐各省之員以爲卽當行例故又重言申明耳所詢緩行之年月如無意外之變準定緩至開議院時其條款卽照八十二年四年八年舊例耳無新增者云因詢以開議院時又將如何梅律師云以前上議紳可六請於總統將中美兩國來往公文交議院再議前總統已交議院將來開議院時自當再議毫無疑義微窺新總統之意爾時必密示意議院議廢蓋力之例現總察院之齟齬各省之詆冒總統不言而心銜之愈以堅其廢例之意耳利亞頓亦以爲然因當卽發電至總理衙門云戶部通飭緩行蓋力領照拘拿之例因

十三日 陰夜雨

前十日巴黎來電言上年秋英兵船在非洲東南之馬達加斯加島遊弋遇法商船疑爲販賣黑奴令其停駛法商船卽升法旗英兵船不信仍派員過船查勘後方放行嗣法廷以此舉詰問英廷言法國向不以兵艦攔海搜查商船爲然況馬達加斯加島由法保護而英艦乃於法國所屬海面查收法船有違萬國公法至販賣黑奴雖係公法准行而法國自有兵船查禁此舉殊謬英廷自知理屈姑覆以英艦之查無損法國國體惟嫌過於認真當通飭兵艦以後勿搜法船法廷以英既認錯現向英廷請賠爲商船餽洗而已

因按上年法兵船大隊至英英主親勞之并備欸一萬

圓設宴以饗之禮意隆矣英兵艦之搜查法國商船意在禁販黑奴其用意非有傷於法國而法國卽有責言何其不念前情不少寬假耶因以爲此交涉之機也易曰履霜堅冰至象曰履霜陰始凝也馴至其道至堅冰也老子云涓涓不息將爲江河熒熒不滅炎炎奈何言慎之於微也言慎之於始也若曰微者不慎其大者將至矣始之不慎其後欲救而無及矣交涉之道其立約皆言兩益其用心實利己而損人當立約之初乘我不知要求於始及立約之後出我不意狎侮於微馴至隨事皆失均平隨時皆肆要挾積習既久直以爲例應爾焉強大之國固然卽弱小之國亦無不然殊可扼腕觀法國所爲可知交涉之竅要矣

十四日 時雨時陰

俄國於猶太人逐之出境禁其入境由來久矣茲有籍隸美國之猶太人擬往俄國遊歷向俄駐紐約領事請給護照領事不允該猶太人遂聯名請於美政府向俄理論謂美國商民俄應接待何以歧異而肆限禁美外部已允行文矣又俄國亞洲屬地地廣人稀從前曾招猶太人居之允爲保護業已安居樂業茲俄國亦已下令逐之出境云 因按地球各國無不存自私自利之見利之所在專之而已雖蒙不韙之名而不惜也英日荷三國屬地華人到者必抽身稅法人近亦效之英於新金山日於小呂宋均不願中國設領事尤不均平美國於華人雖准設領事不抽身稅而時

時以限禁苦之均悖約章而存自私自利之見耳美拒歐洲之工人俄亦拒美國之猶太人并於猶太人之久隸俄籍在保護之列者亦羣驅之所謂信義者安在乎當今之世各國競事富強而富又爲強之基故必專利而防他國之攘奪遂不免有畛域之心固出於不得已然因此而自乖信義豈王道哉

十五日

陰雨中後見日晴

巴西土產以茄非樹膠糖爲大宗近巴西各茄非寮需工孔急緣以前所川黑奴待之無德自前巴西王下令赦黑奴後黑奴遂逃入山變爲野人不願傭工於寮以致上年所產茄非無人摘收者近自萬包約虧銀八九百萬圓巴西政府因竭力招徠德義兩國

之民其應招而來者乃不願作工另謀生計茲聞巴西政府擬派使赴中國并設領事招工現有富商嘉賴爾由金山附船往中國擬招工數萬名載回巴西分撥各寮云 因按前此卡拿大輪船公司來謁言將爲巴西國赴中國招工請爲行文當路因答以入美籍之猶太人應巴西之招而往者困苦不堪因求美駐巴西領事爲之措資載回美國此前鑒也嗣詢諸載回之人則謂巴西國之待工人至爲苛虐所作之事如伐水掘土諸工最勞苦者每日工價不上銀二錢以給衣食尙不能敷然則此陷穽也焉可使吾民輕往乎該公司無言而去今觀黑人尙不能堪則巴西各寮實與祕魯相似上次船期已有所聞卽達諸總理衙門矣

十六日晴

本年二月美水師部大臣以美國上下留心海軍僅此十年之間兵艦固按年加增而海軍人才惜未留心造就以致兵艦造成而閣置船廠數月未駕駛既無以諳習沙綫亦無以保護遠商亟宜設法儲才爲第一著茲於四月初七日議定章程所有統帶兵艦出洋之員定期三年卽當瓜代俾未帶艦出洋者得以出洋學習庶諳練之員日多海軍方爲可恃云 因按海軍管駕機器諸職固有水師學堂教育之矣然欲其諳沙綫習風濤實非久於海舶者不能也英之商船法之漁船其數皆甲於他國實備兵艦之所取材其人畢世以航海爲事童而習之壯而行之不知其苦而常

覺其樂有不可一日離者眞所謂少成若天性習慣成自然矣因生長山村見入山採藥爲業者其行削壁懸崖如履平地望者寒心而採藥者不以爲險值粵匪之亂見黑龍江馬隊之勦賊其人與馬一氣呵成進退周旋無不如志因嘗詢其顛搖之苦罄控之能彼則曰樂此不疲無所謂苦也從心所欲無所謂能也詢以所乘之馬儻爲槍礮所傷能步戰否彼則曰無馬則無命矣然則其人與馬固已合而爲一宜其善於馬戰也中國方興海軍而商船無出海者往來津滬不足爲大洋也閩浙津粵亦有漁船而少有度重洋者然則此項人材似宜早爲之計矣

十七日雨

十三日香港來電言墨西哥國在中國招工現中國地方官已出示嚴禁俟中墨兩國有約後方准興辦以招工之事墨洲各國當其需工孔急始則恐華人之不來及見華人來者日多又欲驅華人而使去美國之事即前鑒也故嚴禁華人出洋云 因查從前美國甚惡黑人時時羣議驅逐自南北花旗之戰美廷立例准黑人入籍與操保舉總統議紳地方官之權遂無議驅逐者然則華人之不容於美乃以不入美籍自誤也美之官紳持正論者言埃利士黨之不安分過於華人而美國不言其惡一則由於入美籍一則由於英美有互交逃犯之約也因又查美與英法日三國均有互交逃犯之約近日美俄亦訂互交逃犯英國丹國均與美有

准客民入籍之約將來中墨立約似應於此二者訂明方少後患
因又查泰西各國於入口之稅均可任意輕重非若中國之一成
不變變則外國挾持之也中貨入美納入口之稅有過於成本者
有值百抽六十者準以中國所收入口之稅幾至十倍二十倍此
亦不可不先訂者此三者訂明後患必少庶幾中國可稍紓人滿
之慮而外國可不效驅逐之尤如果華民出洋而身安中國地產
之出口者必日多而銀錢之漏卮者必日少亦救時之一策焉

十八日大雨時止申後晴

梅律師來見言總統致意外部大臣葛禮山屬總察院長傅爾入
見爲察院所判新例甚不謂然仍堅守前議緩行新例待開議院

時再議又言墨西哥國似有振興之象其總統勤於政事凡於便
民通商之政均實力講求於交涉之道力顧利源不願爲他國所
奪其礦產向運美國煉者今則改爲自煉美國希卡果之會已派
親信之員赴會詳考以資效法又言尼格拉中國內亂海防極

嚴美國輪船名紐約者由巴拿馬赴金山途經該國哥林都海口
停泊上落貨物搭客該國派員上船查驗有無接濟叛黨軍火適
美國新派駐該國之使臣乘坐此船赴任亦不攔阻惟俟查畢然
後登岸因謂美船主即聽其搜驗乎梅律師謂公法如此雖大國
不能不遵且美國商船前實有干預他國戰事者此案美政府已
按公法提該船主訊問治以違例之罪今正欲其查明免至違例

生事也談久辭去 因按此可以比例英人美生之案也此可以證英國辦理美生之案之不公也此可以見泰西各國之於亞洲有歧視之心而不照公法也憤何如之

十九日晴

美國新成巡海快兵艦一艘命名紐約初八日水師部試驗每一時辰能行一百四十里爲向來快船所未有查歐洲各國頭等戰艦外包厚甲內載巨礮形同水面礮臺笨重而不便捷但可守險難以攻戰以紐約快船當之雖不能對敵而共進退靈捷斷不致受損或被擄云 因查近二十年來泰西各國講求海軍其尙巨重者謂輕艦不能當大礮其尙靈捷者謂巨艦不能趨利便二者

相詆實相濟也苟無巨礮何以破敵國之堅艇礮臺苟無輕艦何以攬敵船而奪險要二者不可偏廢兼收並蓄非至富之國不能惟英國兼而有之若不以鄙遠掠地爲心而以完守入保爲事則萬頓之礮似不如鐵甲礮臺而輔以快船水雷其事易爲而其費亦省至於試驗船礮之法則須船廠礮廠之風氣日開日事講求自得其竅要古人所謂閉門造車出門合轍又謂百聞不如一見否則以膠柱鼓瑟之見而測月異日新之機未見其中肯也

二十日晴

查祕魯出使各國公使隨員俸薪按年計之使英二等公使英銀二萬圓使法二等公使法銀二萬圓使美二等公使美銀一萬四

千圓三等公使一萬二千圓實任代辦使事一萬圓頭等參贊四千圓頭等參贊暫行代辦使事八千圓二等參贊二千圓二等參贊暫行代辦使事六千圓隨員一千二百圓以上係指出使英法美而言凡出使何國者卽以何國銀計出使墨洲各國除美國外俸薪均給祕銀亦按使計二等公使一萬二千圓三等公使一萬圓實任代辦使事八千圓頭等參贊三千六百圓以上係指巴西智利墨西哥玻利斐亞四國而言除此四國外頭等參贊代辦使事六千圓頭等參贊三千圓二等參贊代辦使事五千圓二等參贊二千圓隨員一千二百圓武隨員則照在營所得之俸發給其次於隨員者亦照武隨員發給 因於美日兩國出使人員之俸

已查記矣今又查明祕魯出使人員之俸而記之其中出使英法
美三國公使得俸似優然多以代辦充則費亦減矣其他出使墨
洲各國以祕銀計祕銀一千圓核以美銀尙不及六百圓則自公
使至隨員其俸尤爲減矣又查美日祕三國出使人員之俸以中
國較之公使不甚相遠而參贊以下中國實較三國爲優中國創
辦之時較之今日尤優蓋當時未考各國章程故也

二十一日晴

地球各國產煤油以俄美二國爲最多俄國內地行船早以煤油
代煤取其價廉而適用也惟遠涉重洋之船向未聞有以煤油代
煤者本月有歐洲輪船一艘到美國之費城在途試用煤油實爲

利便自此以後煤油又增一銷路矣 因按美國新以電氣行車
進退便捷較馬爲速 因常見之此以電氣代馬力也聞瑞士國之
火車改用電氣較用煤者尤速是以電氣代煤矣化學家謂火
輪舟車將來可不用煤卽以化學分水之淡氣代之是水氣亦可
代煤矣煤油與煤同質用以代煤固意中事俄國煤油向不能比
多於美近年竟至與美頡頏蓋凡物產於地而取之者實在乎人
中國臺灣亦產煤油且聞甚旺探得其法使足給中國之用則美
國之煤油自難入境或亦塞漏卮之一端乎

二十二日 雨時見日

赴梅律師處查各省華民事知尙安靖聞初十日橫濱來電言日

本政府整頓軍務惟日孜孜近日調集國中陸隊似有戰事或疑日本意在與葡萄牙決裂以近日葡國駐日之員不肯約束本國商民以致葡民犯法屢次漏網習以爲常故日葡兩國齟齬日甚一日其實日本察看陸軍特以調動試其緩急可恃否耳 因按葡萄牙自稱爲大西洋國其方輿不及中國二百分之一其民數不及中國百分之一其商輪船不及二十號其歲入僅銀三百餘萬磅除交國債之息僅餘銀一百餘萬磅其陸軍僅三萬餘人其水師輪船僅二十餘號不知其所謂大者何所取義也或亞洲未遣使以前不能深悉其國之實在情形彼自以爲大者人亦以爲大歟或一百年以前英俄兩國壤地尙未極廣民數尙未甚多故

不致相形見小歟因嘗詳考其國債皆貸自近百年之中然則一
百年前該國雖不爲大而尙不爲貧今則貧弱交迫借貸無門至
於鬻地日本深知其國勢故不受其牽制而與齟齬亦所謂識時
務者也因料葡萄牙之無能爲也 戊初外部來文訂於二十三
日午正赴衙門商事

二十三日晴

午初偕繙譯赴外部衙門英法公使均已見現見者爲瑞士公使
因於午正見面葛禮山言費城地方官援一千八百八十四年例
於近日華人之由卡拿大潛入境者拘五人訊問此不過應故事
而已因答以昨已聞之此五人者實非潛越入境已屬梅律師先

問戶部亦擬商之貴大臣葛禮山曰果非潛入境者必不多事中
國美商尙相安否因曰我政府既任保護必不失信尙望貴大臣
克踐前言葛禮山答以自應踐言然證諸近日見聞似亦可相信
矣因謝之遂辭出卽至梅律師處詳述之律師允往見戶部并言
近日華盛頓省關吏查出域多利輪船名海代者常私載華人及
洋藥由卡拿大偷入美境訊出上年十二月十六號曾運入煙膏
值一萬圓華人八十五名今正九號運入煙膏值一萬八千圓華
人三十三名二十四號運入煙膏值銀三萬圓華人五十六名二
月十七號運入煙膏值四千圓華人十七名關吏已將該船扣留
矣

二十四日晴

美國駐墨西哥之公使黎安現已瓜代回美言墨國礦產五金地土膏腴實爲富強之基如得其人可以立起貧弱墨國土產半運入美銷售其入口貨則美國較他國爲多美墨如立報施之約美國可奪他國入口之利而墨國亦有益云 因觀美使之言知使者之所事事也其所駐之國在墨則考究其礦之多寡地之肥磽墨與美毗連則考究其入口出口之貨物如美國之土產入墨難銷於墨則必思所以調劑之如墨國之土產入美有礙於美則必思所以限制之今見美貨之入墨者較他國爲至多則思與墨立報施之約報施之約成則他國之貨入墨尤少美國之貨入墨更

多可以奪他國之利而自專其利此皆利己腴人之見也然爲本國謀者固應如是也

二十五日晴

美廷以寓亞洲及南墨洲之商民時遭不測亟需保護因定造小兵艦容一千二百噸者三艘爲駛行內江之用不日興工其一艘以鋼作船身其二艘以木板作船身外以銅皮包裹緣美水師部驗得鋼底之船入水未久卽有海蟲附著於底積厚則船行遂遲不如銅底之無垢而行速而銅底又苦價貴故不全用銅而用銅表木裏其價適與鋼等云 因謹按周禮冬官言智者創物創誠未易言也泰西之創輪船近百年矣其初創數十年猶不適於用

也兵船之鐵甲亦屢更改鐵甲易而爲鋼甲鋼甲易而爲康邦康邦今又易爲白鐵卽尼克爾求其堅而又堅也昔中國向德國船廠所造兵船英廠詆之其實製造之理精益求精欲其毫髮無憾必不能也海蟲附著船底減行船之速力十年前已聞之當時謂有一種藥物抹於鋼面可以却之今久不聞用豈其用之而不效歟然則事非親歷誠未易言也

二十六日晴腹痛

倫敦來電言法國加兵於暹羅肆其蠶食初意以爲不血刃而可得地先聲所至暹羅自然降服不料屢次接仗法人不敵暹羅而屢敗遂疑英國私助暹羅前此法駐英使開缺回法以後至今尙

未派使云 因謹按越南緬甸暹羅三國毗連而緬甸暹羅又外
與印度毗連自法取越南英取緬甸而暹羅岌岌惟暹羅向結好
於英故英遲遲未忍滅之法亦以暹羅親英之故而未敢遽滅之
查地球小國本有藉大國牽制而存者如檀香山則英與美相牽
制比利時則德與法相牽制摩洛哥則英法義日四國相牽制波
斯阿富汗則英與俄相牽制土耳其則歐洲各大國合而與俄相
牽制其不亡者以此也今法人垂涎暹羅內江之地英恐其全折
入於法必踵緬甸之故智卽不滅亡暹羅斷難自主矣
二十七日晴

日斯巴尼亞近年查點民數計男八百六十萬七千名女八百九

十四萬三千口共十七兆五十萬人現在未見增加也寓居日國之客民約三萬五千人日國兵額無事時計十一萬五千人有事可增至一百零八萬三千人內有撥各屬駐防者四之一男子過二十歲例當兵三年以後有戰事仍應募水軍八千五百三十人水手一萬四千人云 因查日國十年前民數僅十六兆此十年中增一兆矣土非甚廣也民非甚多也從前查理第五稱霸者何也豈得人而興歟抑發憤爲雄歟墨洲之地係日國所開闢豈勤遠略歟惜其兵力不足以守之而爲強國所攘奪則因本國之勢不盛如樹之根柢不深者其枝葉不能暢茂也現英國之勢頗似日國之前共三島之地褊小與日地相似而海軍之強則大過之

就日之往事以論英然則英之盛衰當視海軍之盛衰爲消息乎
二十八日晴

美報言日斯巴尼亞今爲君政之國然光緒七八年間曾舉開士
達拉爲總統越二年而退位今其人尙存爲日國所重然年已老
邁無志富貴矣 因查日斯巴尼亞遵依薩伯拉之變求義國王
子爲君旋告退而國人公舉開士達拉爲總統爭戰頻年仍改君
主此前事也地球各國制度不一瑞士國竟不設總統此眞民政
也法國君政民政時時變更墨洲向惟巴西一國非民政今巴西
亦改章則皆民政矣合而論之各國君政民政雖異而設議院則
無異惟亞洲之國向無議院日本新設議院章程未備人情未習

頗有囂張之氣其弊有甚於法然議院之通下情同衆欲雖小疵而實大醇也

二十九日晴

葡萄牙以本年量入爲出不敷銀一千七百五十萬圓擬由議院定增稅則凡一切日用之物無有不增凡本國及他國商民在境內所設之大小銀行公司均按所獲之利照一千八百九十一年稅則再加一倍征收凡襲職承產人等及房飯飲食所需無有不加以期彌補云 因查歐洲各國稅歛之重中國數千年來所未見也葡國所定稅章之苛又歐洲數十國中所未見也其本國不亂者何也則議院之力也議院通上下之情如極貧之家鬻子女

典衣服并日以食而不怨者其情通也其他國不爭者何也則公法所准行也稅則爲內政自主之國應自主之非他國所能干預也或曰不慮其病商病民乎不知商有病而無利則公司可以不設貨物可以不來其進退綽有餘裕也地球之上凡強大之國皆以商務朘削小國如中國之所謂盤剝故富者愈富而貧者愈貧尙幸有稅則以調劑之如稅則之權不自操則茫無把握矣可畏哉

五月初一日晴

義公使新作爲頭等公使因往道喜又赴巴西專辦公使祕魯參贊處答拜聞英國以麻六甲國殺斃英人一名勒令賠卹麻六甲

國主久未照覆英人將下哀的美敦書限以二日不覆則用兵云
因查麻六甲爲亞洲南洋小國華人流寓甚多久已歸英保護
矣顧法人保護越南而旋滅之英人保護緬甸亦旋滅之泰西所
謂保護者猶云係我之所有而管攝者也而保護之地與藩屬又
不同藩屬之地則由我設官以治其民保護之地仍由本國之君
治其民而我得管攝其國事故泰西各國不以越南琉球緬甸暹
羅爲中國屬土者此也麻六甲已歸英人保護英之滅之如發蒙
振落列爲屬地則與印度治法相同聞廓爾喀亦已歸英保護不
及二十年其將與緬甸越南同亡乎

初二日晴

英國兵籍一千八百九十二年可用之兵共二十一萬三千五百四十人內馬兵一萬九千七百零五人礮兵三隊一爲馬隊三千七百四十人一爲平原隊一萬四千三百零八人一爲山隊一千二百七十七人駐守要隘之兵一萬六千五百三十六人工匠隊七千四百五十八人侍衛隊五千九百四十九人行伍步兵十三萬三千一百零十人外藩隊四千三百八十七人運糧隊三千四百九十二人軍火隊八百十三人兵衣隊三百七十七人醫藥隊二千四百三十二人武職大員七千六百五十三人小員一萬三千三百三十一人以上兵隊駐英者十萬六千一百十五人駐各屬地與埃及者三萬四千二百四十人駐印度者七萬三千一百八

十五人兵之年歲在十七以下者一千三百零三人在十八十九之閒者過半在二十以上者不及三之一云 因嘗聞德國陸兵天下莫強其法令民年十六以上者當兵三年然後各事其業仍備調遣此通國皆兵也其兵制則當兵者之年齒必年十六以外四十以內過四十者則除其名卽有精力尙強行伍諳習者再展五年但至年四十五雖精力可用亦不用矣今觀英國兵制亦與德同戈登嘗言當兵之士必能浹旬不眠并日而食而不疲病此非少壯者萬萬不能中國營規老病者多充數似宜以此矯之

初三日 陰小雨

查本年各國駐美使員人數英國頭等公使一員有室參贊三員

日

記

卷十五

二十五

水師隨員一員法國頭等公使一員叅贊二員武弁一員文案一員義國頭等公使一員有室參贊一員隨員一員墨國二等公使一員有室參贊二員隨員一員武弁一員和國二等公使一員土耳其二等公使一員參贊一員奧國二等公使一員謀士一員尼格拉國二等公使一員有室參贊一員可倫比國二等公使一員有室參贊一員朝鮮代辦一員瑞士二等公使一員參贊一員隨員一員比國二等公使一員隨員一員葡國二等公使一員參贊一員瑞典二等公使一員參贊一員丹國二等公使一員有室日本二等公使一員有室參贊一員謀士一員水師隨員一員武弁一員巴西二等公使一員有室參贊二員考究博學專使一員有

室參贊二員德國頭等公使一員參贊一員考究博學隨員一員
文案正副各一員夏威夷國二等公使一員威內薩國二等公使
一員有室參贊一員隨員一員俄國二等公使一員參贊二員海
代國二等公使一員參贊一員祕魯國二等公使一員參贊一員
隨員一員日國二等公使一員參贊二員隨員一員武弁一員巴
拉圭國二等公使一員哥斯答力憂國二等專使一員有室阿鎮
丹國代辦一員有室智利國代辦一員隨員一員

初四日晴小女得疾甚劇以橘紅薑蔥汁灌之而甦

考地球各國所派出使駐美人員全備於是英俄德法奧義歐洲
六大國而多者不過五員少者僅止二員亞洲之國如朝鮮日本

朝鮮僅代辦使事一員日本則五員墨洲之智利阿鎮丹二國皆派員代辦使事僅一二員統計地球派使各國中國而外共二十八國使館人員無有過五員者志之以備參考

初五日晴

是日設醺 四月十七日丹國來電言丹國與德國接壤從前兩國構兵丹敗遂割列司威克省與德以和計二十餘年矣此省民人至今不忘丹國近日聚衆公議欲背德國而復隸丹國云 因查丹國民數十兆入欸銀一千萬餘兩陸兵三萬八千餘員名兵船三十餘號馬力無及一千匹者蓋小弱之國也自與德構兵不勝而割地以和所割之地并都城而棄之蓋其國勢之難振與

土耳其共同而又甚焉近年所以不遽削亡者以俄君之后爲丹主之女俄不覬覦而德亦不便侵佔以防與俄齟齬也民思故國固足見其純良然琉球越南之民豈一日忘中國卽上年阿洲被夷之國太平洋被佔之島其上下均不甘心所無可如何者兵力之絀耳傷哉

初六日晴

義國政府擬爲爲國出力之兵丁受傷而不能力食者籌款給其衣食俾終餘年議紳以本國入不敷出此項養贍之費非八千萬佛郎不敷事遂未成云 因查美國養贍殘兵有房屋有園池歲費銀一萬八千萬圓較之義國所籌逾十一倍而按年取給焉則

二國之貧富相懸可見矣近日戰事非復古時未戰之先而籌攻守鐵艦之費礮臺之費槍礮火藥之費水陸糧餉之費均以百千萬計非貧弱者所能籌也既戰之後而籌養贍如美則按年需銀一萬八千萬圓歐洲諸國舍英法德俄四國無能籌此鉅款者矣卽如義國亦需銀一千六百萬圓舍二等之國其他亦不易籌然則處今日之勢富強者恣其所欲貧弱者坐以待亡欲如周禮之大小相維豈可得哉

初七日晴

查現在美國辦事處自總統以至各衙門人數總統處正副參贊各一員文案二員書辦四員上議院紳八十八員參贊一員教士

一員總辦一員文案二員書辦十員下議院紳三百三十二員教士一員總辦一員書辦一員外部大臣一員副外部三員律師一員總辦一員管理出使事務官一員管理領事事務官一員繙譯一員內部大臣一員副內部二員總辦一員書辦七員戶部大臣一員副戶部三員總辦一員幫辦一員書辦五員稅務總專員一員幫辦一員書辦四員派往各埠專員二十五員看驗各稅關專員五十一員派往巴拿馬看驗專員十一員華人禁例事看驗官二十七員兵部大臣一員副兵部一員總辦一員書辦四十六員水師部大臣一員副水師部一員總辦一員書辦十六員郵政部大臣一員副郵政部三員總辦一員律政部大臣一員總狀師一

員副律政部四員幫律司六員總辦一員總委員一員律務書辦
二員赦犯事務書辦一員又書辦十四員農部大臣一員副農部
一員參贊一員總辦一員書辦二十三員總察院衙門首領一員
總察院八員書辦一員錢債衙門總察院一員察院三員總辦一
員幫辦一員書辦三員

初八日晴

又查美國出使各國人員數目出使中國公使一員參贊二員繙
譯一員總領事一員領事八員使英公使一員參贊二員總領事
六員領事七十三員商董二十二員使法公使一員參贊二員總
領事一員領事十五員商董八員使德公使一員參贊二員總領

事二員領事二十員商董四員使俄公使一員參贊二員總領事
一員領事五員使奧公使一員參贊一員總領事一員領事三員
商董一員使義公使一員參贊一員總領事一員領事十員商董
一員使日公使一員參贊一員總領事一員領事十五員商董六
員使和公使一員領事七員使比公使一員領事四員使日本公
使一員參贊二員繙譯一員總領事一員領事二員商董一員使
朝鮮三等公使兼總領事一員參贊一員使祕公使一員參贊一
員領事一員使葡三等公使兼總領事一員領事四員商董一員
使暹羅三等公使一員使瑞典公使一員領事四員使瑞士公使
一員領事五員使墨公使一員參贊一員總領事二員領事十七

員使巴西公使一員參贊一員總領事一員領事五員使丹公使一員領事二員使夏威夷公使一員總領事一員此外遣使尙有二十二國非中國所注意者不載

初九日晴

美國開闢僅四百年而富甲於地球因嘗至其議院觀其議政而知其簡也今又考其內治外治之迹則各部衙門堂官三十二人總辦以下如中國之郎中員外主事一百四十三人書辦一百三十一人如是而已遣使共四十三國所設之官僅三百三十員考其設官之權衡而知其注意於商務并知其注意於行銷本國之土產商務之盛以英法德義日爲最所設領事至一百四十四員

墨西哥雖小國而與美毗連美之土產易於運出其公使參贊僅各一員而領事多至十九員可知其用意之所在矣亞細亞洲中國最大行銷煤油洋布麵粉最多故公使以外參贊繙譯僅三員而領事多至九員俄雖爲大國而本國自產煤油麵粉遣使而外所設領事尙不如中國之多若朝鮮若暹羅則皆以三等公使兼領事朝鮮僅二員暹羅竟一員以其地小而美國之土產不足以行銷也至於葡萄牙則亦以三等公使兼領事美國設三等公使者共五國曰葡萄牙曰朝鮮曰暹羅曰海帶曰列伯里朝鮮爲中藩暹羅不能自主海帶列伯里民數不滿一兆入款不過五十萬磅比而論之而葡萄牙之國勢可知矣 因嘗謂葡萄牙爲貧弱

今證以美之遣使而益有徵又各國之遣使駐美者英法爲頭等公使有參贊三員而無隨員俄有兩參贊亦無隨員日國亦兩參贊德國義國參贊皆一員奧國竟無參贊公使之外僅謀士一人又地球各國之遣使均無所謂副使者今因考究而始知之

初十日晴

亞洲內地俄屬西達地阿省之他時干地方上年所產棉花多而且美保蘭省布商在該處購辦棉花十八萬石又俄國東南各省所產煤油近年運出愈推愈廣獲利愈鉅今俄與法商俄國願減法國貨物六十種之稅法國願減俄國煤油入口之稅已成議云因聞埃及種棉得法所出之花已美俄國種棉以前尙不得法

今亦漸精可分美國之利亦猶印度之茶法義之絲舉中國者奪中國之利矣煤油之利向爲美國所獨近十年來俄產日多居然抗衡信乎人力可用而風氣宜開也至於彼此訂稅以期土產之行銷皆爲防本國貨物之棄於地利源之奪於人地球各國共所以謀國者大抵如斯而未有不如斯者矣

十一日晴移居樓下北房

上月十八日倫敦來電言歐洲大國分爲兩盟戰守相助其餘小國各有所附惟英國處局外而獨立有識者論時度勢咸謂英國陰向德奧義而不與俄法但未顯露痕迹昨議院有以此意詢諸外部者外部並不明言但謂英與德奧義三國交涉之事共見共

聞云耳 因按英皇以保歐洲昇平爲念久已聞之若英向俄法而不與德奧義是使歐洲各國無一日得昇平也俄并奧而法并德俄法將強於英英介兩強之間是英亦不得昇平也今英不與俄法俄法有所憚而不開釁於德奧義英向德奧義必不憚惡德奧義以開釁於俄法則各大國無敢爲戎首者而大局昇平矣惜乎日本之不知此意也歐洲各國方合志以脗創亞洲所立之約均與公法相違日本不與中國爲輔車相依之計而爲同室操戈之謀誠莫解其意之所在矣

十二日

晴五更雷雨天明雨止

巴黎來電言歐洲各國二十年前兵額過百萬者惟德俄法三國

今奧義土亦然現各國有戰事時德能集兵五百萬人法能集兵四百三十五萬人俄能集兵四百萬人義二百二十三萬六千人奧一百九十萬人土耳其一百十五萬人英重水軍而輕陸軍僅六十萬二千人此外各國能出數十萬人者尙多較之二十年前已三倍云 因查德法兩國之民僅八千萬婦女居半老幼居四之一精壯男丁度無過二千萬人矣而當兵者近一千萬人此亦振古未有之創局也顧德法之國勢實處不得不然德介法俄而法介英德故也土耳其於十年前俄兵壓境國雖不亡而版圖之爲各國分裂者過半懲前毖後故亦勉力增兵爲防俄計如早籌之則無削地之事惜其亡羊而後補牢也中國民數極多集兵數

如德法二國之額易於反手然而餉無可籌則商務未興之故也

十三日 晴夜雨

英屬澳大利奧各省分治稅則未能畫一茲各省官紳會議內地貨物彼此往來均不納稅惟外來貨物則照各省議定之稅則納稅又義國近年大旱五穀歉收有建議減稅以招徠五穀入口者政府以入款不充未允倫敦來電云美與巴西訂立報施之約巴西准美國之布入口免稅查美國所織之布向不如英之細故英布易銷乃自免稅後美布價賤於英其布遂難銷售云 因卽今日所見聞者比而論之一言以蔽之曰皆注意入口之稅與土產之銷而已澳洲免內地之稅者注意入口之稅也義國不以歲歉

而招徠五穀者注意入口之稅也但不恤民飢未免財聚民散然
上年俄之歲歉已如斯矣英電所言則注意土產之銷而恨其爲
美所攘奪也巴西免美布入口之稅美國於巴西入口之貨亦必
有免稅者所謂報施也惟英電祇爲英布之難售立言故不暇牽
及耳

十四日陰

上月二十四日伯林來電言奧國外部宣言本國政府現有與俄
復修舊好之意德國官紳聞之謂奧之詐虞不足恃不如卽與絕
交與日國瑞士國聯絡查奧雖爲歐洲大國而民種紛雜不和故
外與德聯盟而民之附俄者仍不少奧君亦無可如何本月十二

日又聞德奧之交近日益離奧君亦漸露痕迹云 因聞此而歎
曰怨毒之於人甚矣哉二十年前德國伐奧奧敗而割地以和其
時德奧勢均力敵城下之盟非所甘也迨德法構兵俄以重兵壓
奧境奧雖欲助法報德而力不能至德挫法而霸歐洲其勢已盛
奧自問難與角勝不如親之以息事甯人然舊怨終未釋也今法
之元氣已復而又與俄聯盟奧附俄則俄強而德義兩國之力決
不能與俄法奧三國抗衡歐洲其將有戰事乎

十五日陰

上月二十七日巴黎來電言德奧兩國政府近日不惜巨款將所
用之槍改造以求格外便利茲法國亦擬改變擬撥欸一萬佛郎

云初五日美國官廠新成大礮一尊可在水中施放暗擊敵艦之
底上年所成者試驗尙未盡善此次係加工改造者較爲合用擬
卽日在紐鉢埠試驗云 因觀歐洲大局軍務日亟戰具亦日新
昔之師行日數十里者今以鐵路調兵日行數千里矣昔之用刀
矛弓矢者今一概易而爲槍礮矣匪特此已也德國以氣毬偵俄
營之虛實俄亦擬以氣毬拒之過此以往將有以氣毬合戰者矣
法日兩國已創水底行船美國現亦興造然不過爲施放水雷計
也今乃創水底施放之礮夫水有阻力礮彈之行將掣泥帶水而
前豈能迅速豈能及遠卽中敵船又豈能深入是必有善法避此
數端然後可用也陸戰用氣毬是陸軍不必交鋒於地面水戰用

泗船是水軍不必交鋒於水面鬪智炫奇而民生之禍亟矣

十六日 陰時小雨

又伯林來電言德國事勢以添兵爲至計因其地介法俄兩國素好多事又無高山巨浸之天險隔隔敵人可以長驅直入兩面夾攻德國雖強安能首尾兼顧且法國與德毗連之一面礮臺相接鐵路相聯地底電綫暗通消息若兩國構兵德國卽勝亦不能闖入法國內地以法之礮臺足以扼要堅守也俄國與德毗連之地雖不若法國礮臺之多然其重兵其布鐵路四通一旦有事可以立刻調集兵將數十萬人越過德界是以德國熟籌形勢不敢粉飾宴安惟有朝夕淬厲選將練兵以防敵國兼并云 因嘗讀易

傳云危者安其位者也亡者保其存者也亂者有其治者也夫差之亡亡於盟晉勝越之後後唐之敗敗於繫燕函梁之終所謂宴安酖毒也士曾慮楚人之乘我卒以全軍相如防涇池之劫盟卒以全趙所謂有備無患也綜觀今日事局地球各國搶攘之勢迴古所無名爲睦鄰實則伺隙稍與欸洽則肆要求偶有齟齬則肆迫脅今日遣使明日可以絕交此種狡猾惟不敢施於英俄德法四邦其餘均所難免愈弱之國愈不能免惟德國所處之地爲最難幸其兵力尙強足以杜敵人之窺伺耳

十七日陰

謁梅律師於公事房遇上議院紳可六言今年開議院現已定議

提早於西歷九月四號卽中國之七月二十四日也中美交涉之事華人領照之例當再議矣因謝之又言俄將踞巴美兒地方前英員之往探者被俄將領驅逐經英政府詰問俄廷雖將該將領撤回而俄主召見該將領特深嘉其膽識俄與英議願撤兵出巴美兒境地與英派員會清地界而聞俄兵實仍駐巴美兒境地且築礮臺英已派員赴巴美兒驗其虛實俄人之言殊不可信中國似宜設備因答曰中國已調兵赴該處矣談久而別因按論地球大勢則英法之鯨吞小國可畏論歐洲大勢則俄人之蠶食鄰國可畏論亞洲大勢則俄英法三國之逼近環伺尤可畏蓋俄人犯歐洲英人必拒之且必合德奧諸國以拒之俄人無能爲也亞

洲之勢則不然東三省新疆與俄接壤西藏雲南與英接壤廣西與法接壤一國發難則兩國坐視此必然之勢矣且非惟坐視也乘我之急以收漁人之利此可預知者矣爲今之計惟有興鐵路以合南北之勢增船塢以固水陸之防無可緩也

十八日晴時見雨點

日國向來入不敷出聞其首相通盤籌畫開源節流居然取給當卽函屬駐日代辦使事查其節目今始寄到亟爲錄出計共入欸一收旧房牲畜稅銀上年三千二百四十九萬七千五百四十八圓本年短收銀一百五十五萬七千五百四十八圓此項短收之故係由該三項俱係按所出之欸以輸稅課目下酒價房值俱形

低落又兼牧場被旱牲畜養較難也一收貿易稅銀上年八百二十七萬一千二百七十圓本年長收銀五十二萬八千七百三十圓此項長收之故係山前被蒙混今則核實也一收承業稅銀上年八百一十六萬零七十五圓今年短收銀四十萬零七十五圓一收新封及承襲爵秩稅銀上年一十六萬圓本年同一收人稅銀即身上年一百八十萬圓今年長收銀一十萬圓此項長收之故係山將數省人稅包與人承收故盈於國家自征之數也一收俸稅銀上年三百八十萬圓今年長收銀八十萬圓此項長收之故係山按俸薪之大小而遞加稅項也一收支出官款城款稅銀上年一百三十七萬四千八百七十三圓今年短收銀一十三

萬四千一百七十三圓此項短收之故係由納俸稅者免輸此稅也一收施與教堂尼院財產稅銀上年六十萬圓今年長收銀六萬八千八百圓一收私家馬車稅銀上年無今年長收銀二十萬圓此項前經裁免茲復征也一收斐士加亞等四省包稅銀上年一百三十二萬五千一百九十五圓今年長收銀四十萬圓此項長收之故係由約定如他省稅款加增該省等亦應將包解之稅照加也一收進口稅銀上年一千八百八十萬圓今年長收銀三十萬圓此項長收之故係由稅則新增也一收出口稅銀上年二千圓今年長收銀一十九萬八千圓此項長收之故係由稅則新增也一收上貨稅銀上年九十萬圓今年長收銀四萬圓一收下

貨稅銀上年七十萬圓今年同一收搭客稅銀上年五萬圓今年同一收關口查驗貨物粘貼標記費及馬頭捐銀一十四萬圓今年同一收進口船隻檢疫費銀上年二萬二千圓今年短收銀二千圓一收罰款銀上年一十四萬圓今年短收銀二萬圓一收常欠關稅之息銀上年三千圓今年短收銀二百圓

十九日陰

梅律師來見 一收住各國商民人等所捐之領事經費銀上年四十六萬五千四百圓今年長收銀一萬五千四百圓一收城稅銀上年一千五百七十四萬八千二百一十九圓今年短收銀七十四萬八千二百一十九圓此項短收之故係由日用之物稅課

較前稍減也一收烈酒加稅銀上年一百五十九萬三千七百六十一圓今年短收銀五十九萬三千七百六十一圓此項短收之故係由各商知稅則將增而先期多運進口也一收糖稅銀上年四百五十萬圓今年短收銀四十萬圓查此項糖斤多係運自古巴前此統列屬地進口貨內嗣與本國糖寮稅項專作一款本屆之所以短收者亦由於稅課未加之先運來頗多也一收火車捐銀上年二百四十萬圓今年長收銀一十萬圓一收土單進款銀上年一千零二十八萬四百六十圓今年短收銀六十二萬四百六十圓查土單一項新例無論何項約據均須粘用而收數反較前稍減者一由生意淡薄一由事多面訂不動紙墨也一收紙牌

稅銀

係新稅

上年無今年長收銀一十六萬圓一收售賣火藥稅銀

係新稅

上年無今年長收銀八萬圓一收土巴菇公司租欸銀上年

一千八百七十二萬圓今年長收銀四十八萬圓此項長收之故

係由吸食者多而銷數較旺也一收火柴公司租欸銀

係上屆新立者

年八十萬圓今年長收銀五萬圓一收彩票進欸銀

彩欸不在內

上年

四百八十萬圓今年長收銀六十萬圓此項長收之故係由彩票

增添也一收鑄銀局羨餘銀上年六十萬圓今年短收銀四十萬

圓此項短收之故係由上屆鼓鑄銀圓太多本屆須酌減也一收

代滙本國各處零欸滙費銀上年八萬圓今年同一收官報進欸

銀上年八萬圓今年長收銀一萬圓一收各國信局攤派信資銀

上年三萬二千圓今年長收銀八千圓一收各國電局攤派電費暨新設德律風進款銀上年九萬圓今年長收銀一萬圓一收售賣犯人所製之物進款銀上年二萬八千圓今年同一收陀乃非愛喝鹽場進款銀上年三十萬圓今年長收銀一十五萬圓此項長收之故係由將該場包與人承辦也一收阿馬丹水銀礦進款銀上年一百七十二萬圓今年短收銀三十二萬圓此項短收之故係由水銀價低落也一收利拿來鉛礦進款銀上年四十萬圓今年短收銀七萬圓此項短收之故亦由鉛價低落也

二十日晴

一收加來尼亞島海口稅銀上年九萬圓今年同一收官產租款

銀上年五萬圓今年短收銀二萬二千圓一收河稅銀上年二十萬圓今年長收銀四萬圓一收售賣官家樹木進款銀上年二萬圓今年同一收收回之官產進款銀上年五千圓今年同一收收回之教產進款銀上年三萬二千圓今年短收銀三千圓一收捐免禁止禁日食葷照費銀上年五十三萬四千圓今年短收銀九千圓一收鐵路公司繳監察經費銀上年二十四萬二千五百六十圓今年長收銀二千二百四十圓一收負欠官款之息銀上年五萬圓今年短收銀八千圓一收各省認捐看路經費銀上年二十萬五千六百圓今年長收銀二萬七千二百圓一收各省認捐學校經費銀上年四十萬圓今年短收銀二萬圓一收官權量進

欸銀

係新立者

上年無今年長收銀五萬圓一收半成城稅加欸銀上

年無今年長收銀二十萬圓此項加欸向山府尹征收茲由國家
征收是以提取半成也一收施與教堂等產業一成進欸銀上年
一萬七千圓今年無一收收回之書院產業進欸銀上年二萬圓
今年長收銀一萬六千圓一收公地二成租欸銀上年七萬零二
百圓今年短收銀二千圓一收林場一成租欸銀上年無今年長
收銀四千圓一收押欸進項銀上年一萬五千零五十圓今年短
收銀二百七十四圓一收樂助官書局欸項銀上年一萬四千五
百圓今年短收銀九千一百圓一收售賣官產分年呈繳價銀上
年一百二十六萬八千四百圓今年短收銀一百五萬八千四百

圓一收售賣水師廢棄之物進欸銀上年二十萬圓今年無一收

賜產贖欸銀上年六萬圓今年同

所有賜而未經收回之產皆例每年應進方物嗣改令繳銀以

之

一收售賣雜物進欸銀上年二萬圓今年無一收捐免富兵進

欸銀上年一百八十六萬圓今年同一收舊欠官欸銀上年三十

六萬圓今年同一收官棧棧租銀上年一萬九千圓今年長收銀

一千圓一收溢收各欸銀上年一十六萬圓今年同一收官欸存

息及折扣銀上年九萬五千圓今年短收銀一千圓一收屬地貨

物稅項銀上年二百二十萬圓今年短收銀一十萬圓總結一千

八百九十二至九十三年分計收銀一萬四千九百五十九萬二

千一百一十一元一千八百九十三年至九十四年分計收銀一萬

四千七百四十九萬五千二百七十一圓短收之欸計銀六百七十三萬六千二百一十圓除以長收之四百六十三萬九千三百七十元相抵外仍較上屆短收銀二百零九萬六千八百四十圓二十一日晴是日爲西歷七月四號乃美國改爲民政之日

計共出欸一宗室項下上年計銀一百九十萬圓本年節省銀二十萬圓此項節省之故係由攝政君后自願將王俸裁減也一國債項下正債息銀上年五千四百五十四萬三千一百六十三圓本年節省銀二萬七千七百七十一圓浮債息銀上年三百六十一萬七千五百一十六圓本年多用銀三百六十七萬九千九百零四圓一上年不敷銀一百二十圓本年多用銀三萬一千圓一

上下議院項下上年計銀三十四萬四千八百五十二圓本年節省之數尙未議定一津貼收回賜產項下上年計銀四十萬四千六百四十一元本年節省銀四萬一千一百九十五圓一恩俸項下上年計銀一千零九十五萬零二百四十圓本年節省銀二萬零二百四十圓首相衙門項下一本衙門暨軍機處等經費銀上年一十九萬五千六百一十圓本年節省銀八萬零二百六十圓一舉行閣龍會經費銀上年二十四萬圓本年無外部衙門項下一本衙門人員俸薪銀上年八萬六千三百圓本年節省銀四千圓一本衙門雜用銀上年一萬六千六百九十三元本年同一出使人員俸薪及公費銀上年四十六萬二千九百八十五圓本年

節省銀三萬零七百九十五圓此項節省之故係由裁減駐德之
漢伯格駐南美洲阿鎮丹國之坡愛羅士崖乃士駐奧之特立士
特駐比利時之安特沃卜駐美之紐饒林及紐約駐阿非利加洲
屬法之亞及利亞之亞及愛士駐法之包朶及馬賽駐英之直布
羅陀及立弗埠及倫敦駐葡之立士本

即葡都

名領事署公費銀六

千三百零五圓裁撤駐荷蘭之使署

以駐比利時公使兼使荷蘭

銀五千五百

七十圓裁撤駐義大利使署二等參贊銀一千五百七十圓改駐
瑞士之二等公使爲三等公使銀五百圓改駐墨老哥二等公使
爲三等公使銀五百圓裁減各使署公費銀四千五百一十五圓
裁撤駐義大利之克立亞立駐中美洲薩法島國之森非生太駐

德之丹習克駐土耳其之康士旦丁羅卜爾即土都駐美之查士登

駐之海立非格士駐義大利之乃港駐法之陀羅士等領事署銀

一萬四千一百三十五圓降駐中美洲夸的馬拉國之森唐姆士

法之梅揚等領事署銀一千圓共銀三萬四千零九十五圓除加

駐磨洛哥使署繙譯銀二百圓及設駐阿非利加洲之三習把領

事緣與英國議定設官會查販奴船隻經費三千一百圓淨共節省銀三萬七百九

十五圓一出使人員房租等費銀上年七萬四千九百九十五圓

本年節省銀四千七百六十圓一出使人員川資電費信資新聞

紙費以及修理官房資助在外國之日國難民等費銀上年一十

八萬四千四百七十圓本年節省銀一萬七千五百圓

二十二日晴

一教法院經費銀上年三萬圓本年同一津貼者羅色難教會銀
上年七千二百五十圓本年同一津貼在外國之教堂書塾暨教
士川贊銀上年一十一萬二千三百九十圓本年同一上屆不敷
銀一萬九千七百九十九圓本年無刑部衙門項下一本衙門人
員俸薪銀上年一十二萬一千七百八十圓本年節省銀三萬一
千八百三十圓此項節省之故係由裁減人員也一本衙門雜用
銀上年二萬七千六百九十四圓本年節省銀九千零九十四圓
一各省刑司俸薪銀上年一百二十一萬一千八百八十七圓本
年節省銀四十二萬七千三百一十五圓此項節省之故係由裁

併刑署也一各縣刑司俸薪銀上年五十四萬六千一百八十六圓本年多用銀一十六萬九百一十四元此項多用之故係由添派人員巡按地方也一各刑署雜用銀上年九萬一千四百四十九員本年節省銀二萬九千七百六十四圓一看監人員等俸薪銀上年九萬四千九百二十四圓本年節省銀一萬四千六百圓一監獄雜用銀上年五十五萬九千六百二十圓本年節省銀七萬八千九百二十圓此項節省之故係由裁減犯人食用等費也一監獄印書等雜費銀上年三萬八千四百二十一圓本年節省銀二萬圓一官房修理費在外國興訟費用以及一切雜用銀上年二十二萬六千圓本年節省銀一十六萬六千圓此項節省之

故係由裁革給見證人之費也教堂項下一教士等俸薪銀上年五百八十八萬五千五百一十八元本年多用銀六千四百零八圓一書院及書樓經費銀上年二十六萬四千八百五十圓本年同一教堂雜用銀上年二百零二萬七千五百三十一圓本年多用銀五千二百四十一圓一教堂修理費及房租銀上年一十二萬六千七百六十六圓本年同一上屆不敷銀六萬五千四百二十四圓本年節省銀三萬八千六百二十二圓兵部衙門項下一本衙門人員俸薪銀上年七十六萬三千四百七十六圓本年節省銀一十萬五千八百一十二圓此項節省之故係由裁減監察人員也一本衙門雜用銀上年六萬七千八百圓本年節省銀五

千六百圓一大將軍俸薪銀上年三萬七千八百圓本年無此項俸薪改列將弁俸薪欸內一各省武衙門人員俸薪銀上年二百一十三萬六千六百六十六圓本年節省銀三十一萬八千七百零二圓此項節省之故係由裁併汎地也一各省武衙門雜用銀上年七萬五千一百四十二圓本年節省銀一萬六千五百圓一將弁兵丁等俸餉銀上年一千四百一十萬五千九百六十六圓本年節省銀一十五萬六千零二十八圓此項節省之故係由裁撤兵丁約九千名暨備調將弁僅予半俸也一兵房雜用兵糧及兵醫院等經費銀上年三百九十萬七千五百七十六圓本年節省銀四十七萬七千二百七十三圓此項節省之故係由裁兵所

致也以兵監經費銀上年一萬五千六百六十八圓本年多用銀三千七百三十六圓一移兵運械等費銀上年二十萬六千二百圓本年同一購馬養馬等費銀上年四十萬一千五百三十圓本年節省銀一萬九千一百三十二圓一購製礮火經費銀上年八十三萬五千二百七十二圓本年同一購置機器經費銀上年七十七萬四千八百八十圓本年節省銀一千一百八十四圓一召募新兵經費銀上年一百一十五萬四千圓本年節省銀一十五萬四千圓一房租息餉以及一切雜用銀上年一十八萬一千一百七十八圓本年節省銀一萬一千一百七十六圓一防軍將弁勇丁等俸餉馬乾銀上年三百三十六萬九千七百四十一圓本

年節省銀一萬五千五百二十九圓一防軍雜用銀上年一千圓
本年多用銀三百五十圓一上屆不敷銀一十萬五千六百五十
二圓本年節省銀四萬九千六百八十六圓

二十三日晴

海軍衙門項下一本衙門人員俸薪銀上年一十八萬零五百零
一圓本年節省銀六萬二千九百四十一圓此項節省之故係由
裁減人員也一本衙門雜用銀上年一萬九千圓本年節省銀二
千圓一將弁兵丁水手等俸餉銀上年二百六十三萬一千三百
二十三圓本年節省銀一十五萬五千六百八十一元此項節省
之故係由裁減軍器局等人員也一各水師衙門及軍器局等雜

用銀上年一百二十八萬六千二百八十九圓本年節省銀一萬一千四百三十三圓一格致院人員俸薪銀上年六萬六千二百零五圓本年節省銀二十二圓一格致院雜用銀上年二萬三千零六十四圓本年節省銀三千八百五十圓一備調將弁俸薪銀上年一十三萬八千零六十七圓本年多用銀一萬一千零一十三圓一保護海濱船隻駕駛人等俸餉銀上年二十萬七千三百九十一圓本年節省銀三萬五千一百七十三圓此項節省之故係由裁減巡船也一保護海濱船隻雜用銀上年一十七萬一千九百八十四圓本年節省銀二萬零二十九圓一上屆不敷銀五萬六千九百七十四圓本年同吏部衙門項下一本衙門人員俸

薪銀上年一十二萬一千一百圓本年節省銀一萬九千六百圓
一本衙門雜用銀上年九萬三千二百圓本年節省銀二千六百
圓一各省巡撫等衙門雜用銀上年六萬四千八百四十圓本年
同一各省巡捕俸薪銀上年六十萬九千三百二十一圓本年節
省銀五百圓一各省巡捕雜用暨房租銀上年二十四萬九千二
百六十九圓本年節省銀五千一百三十四元一各善舉經費銀
上年一十八萬一百七十八圓本年多用銀二千一百圓一保安
局人員俸薪銀上年七千二百五十圓本年節省銀二千三百五
十圓一保安局雜用銀上年二萬六千六百八十五圓本年節省
銀一萬九千八百八十五圓此項節省之故係由裁減防備時疫

經費也一各省保安局人員俸薪銀上年七萬一千四百五十圓
本年節省銀七千九百五十圓一各省保安局雜用銀上年四萬
七千五百七十六圓本事節省銀一萬六千四百八十八圓此項
節省之故係由建干多海口檢疫院將竣工也一郵政局人員俸
薪銀上年四十二萬六千一百九十圓本年節省銀二萬五千圓
一電報局人員俸薪銀上年一百四萬二千七百九十圓本年同
一郵電兩局獎賞銀上年一十三萬八千圓本年同一郵電兩局
紙墨費銀上年七萬零七百八十四圓本年多用銀二千一百七
十圓一郵電兩局轉遞函電等費暨雜用銀上年一百七十七萬
五千零二十圓本年節省銀六萬九千五百七十七圓一郵電兩

局印單費銀上年一萬六千圓本年節省銀四百五十四圓一郵電兩局房租及修理官房費銀上年八萬四千一百圓本年節省銀三千一百八十九圓一郵電兩局傢私費銀上年三千圓本年同一津貼電綫公司暨購送信車輛經費銀上年二十六萬二千八百八十四圓本年節省銀七萬八千七百五十元此項節省之故係由停給加來尼亞島海綫津貼暨裁減送信車七十輛也一上屆不敷銀一十萬四千九百三十圓本年節省銀九萬二千七百三十三元

二十四日晴

美國駐巴拿馬領事阿丹信向能保護華人因爲奏請賞給寶星

上議院已議准佩帶而下議院尙未議因謁外部商請速於開院時議准外部允之農商工學部衙門項下一本衙門人員俸薪銀上年一十三萬零二百圓本年同一本衙門雜用銀上年二萬零五百二十元本年同一各省署人員俸薪銀上年八萬八千零五十圓本年節省銀七萬四千八百圓此項節省之故係由裁撤各省總辦僅留司事一人也共總辦所辦之事悉改歸各該總理署經理一各省署雜用銀上年九千八百二十六圓本年無一總理學校事務人員俸薪銀上年四萬七千二百圓本年節省銀一萬九千八百五十圓此項節省之故係由裁減監察官五十員也一經理學校事務署雜用銀上年四萬二千九百四十圓本年節

省銀一千三百七十圓一小學校人員俸薪銀上年二十二萬八千八百二十四元本年節省銀一萬五千二百五十圓一小學校雜用銀上年一十二萬四千五百一十七圓本年節省銀四萬三千六百零七圓此項節省之故係由停給各鄉塾津貼也一中學校人員俸薪銀上年六十九萬六千八百九十三圓本年節省銀二千六百一十四圓一中學校雜用銀上年九萬三千六百九十圓本年節省銀一萬六千一百七十圓此項節省之故係由停給私家技藝及貿易學堂津貼也一大學校人員俸薪銀上年五十七萬八千三百三十一元本年多用銀二萬四千二百四十五圓此項多川之故係由不得不添教習等人員也一大學校雜用銀

上年八萬零四百二十圓本年節省銀三千八百零五圓一醫學等館人員俸薪銀上年三萬八千九百六十三圓本年節省銀五千七百一十一圓此項節省之故係由裁撤獸醫館二所也一醫學等館雜用銀上年一萬零四十圓本年節省銀五百二十圓一精技館人員俸薪銀上年一十一萬六千六百六十七圓本年節省銀一千八百三十四圓一精技館雜用銀上年六萬二千零四十五圓本年節省銀三萬一千五百五十五元此項節省之故係由本屆無賽畫會也一博物院暨各書樓人員俸薪銀上年計一十五萬零五百八十五圓本年節省銀一百圓一博物院暨各書樓雜用銀上年二萬六千四百三十七圓本年節省銀二千一百八十

五圓一格致書院人員俸薪銀上年二萬八千四百三十二圓本年同一格致書院雜用銀上年三萬八千三百零七圓本年節省銀一百零七圓一官房經費銀上年六十萬零二百三十六圓本年多用銀三萬九千二百四十九圓此項多用之故係由新建本部衙門暨正音學館也一辦理農桑事務人員俸薪銀上年六十一萬五千六百四十三圓本年多用銀一千一百六十七圓一辦理農桑事務署雜用銀上年二十四萬二百四十六圓本年節省銀六萬八千八百八十五圓此項節省之故係由裁減農政局獎賞也一辦理工程事務人員俸薪銀上年一百一十一萬三千零四十圓本年同一工程署雜用銀上年四萬九千八百四十圓本

年節省銀一千圓一修築道路經費銀上年八百二十二萬一千九百二十二圓本年節省銀九十八萬六千四百三十四圓一監察鐵路人員俸薪銀上年一萬九千四百五十圓本年同一津貼鐵路公司銀上年二百三十七萬一千四百一十五圓本年節省銀一百四十六萬二千圓一辦理河務人員俸薪銀上年二萬三千七百二十二圓本年節省銀九千一百四十圓一修濬河道經費銀上年四十八萬九千八百七十圓本年節省銀六萬八百七十圓一管理燈塔等人員俸薪銀上年一十萬六千一百五十圓本年節省銀二百圓一修建燈塔口岸等經費銀上年一百二十四萬四百三十二圓本年節省銀四萬四千九百一十七圓一興

地局人員俸薪銀上年二十四萬二千六百六十六圓本年同一
輿地局雜用銀上年一十三萬二千四百三十五元本年同一上
屆不敷銀六萬八千七百九十七圓本年節省銀一萬五千五百
八十三圓

二十五日 酉刻大雷雨

戶部衙門項下一本衙門人員俸薪銀上年八十八萬一千九百
二十五圓本年節省銀一十萬八千五百二十五圓此項節省之
故係由裁撤總理產業事務局暨更改戶務刑司也一本衙門雜
用銀上年六萬七千九百四十圓本年多用銀九千六百四十圓
一各省署人員俸薪銀上年一百七十二萬六千三百六十七圓

本年節省銀六千零七十五圓一各省署雜用銀上年七萬九千八百四十一圓本年多用銀四千七百一十一圓一辦理水銀礦鉛礦及鑄錢局造土單局等人員俸薪銀上年七萬八千九百八十五圓本年節省銀八千三百六十圓一鑄錢局造土單局等雜用銀上年三千二百三十五圓本年節省銀二百九十五圓一部稽查人員川資銀上年二萬圓本年多用銀四千圓一解銀費銀上年一萬七千圓本年同一冊籍費銀上年三萬五千八百圓本年節省銀六百圓一修置傢私費銀上年一萬六千圓本年節省銀六千圓一房租暨修理官房費銀上年一十四萬六千二百圓本年節省銀五萬五千三百圓此項節省之故係由多用官房

作辦公處也一一切意外用欸銀上年九萬四千二百圓本年節省銀四萬一千圓一上屆不敷銀一萬三千二百四十一圓本年節省銀九千四百三十三圓雜欸項下一征收產業稅經費銀上年六十萬圓本年同一征收工作稅經費銀上年一十一萬六千圓本年節省銀一萬圓一造身紙經費銀上年八萬圓本年節省銀四萬圓此項節省之故係由將數省身稅租出與人承辦也一造士單費罰欸獎賞暨土巴菇行代賣士單用錢等項銀上年四十九萬九千九百八十圓本年節省銀五萬六千三百零一圓此項節省之故係山上屆估計太多也一造彩票費賣彩票用錢暨助各善舉等項銀上年六十四萬五千六百一十三圓本年節省

銀二千三百七十二圓一土巴姑行代匯本國各處零星款項用
錢銀上年五萬圓本年同一鑄錢經費銀上年二十萬一千三百
圓本年節省銀五萬八千八百圓一開阿馬丹水銀礦經費銀上
年三十二萬五千一百四十圓本年節省銀四萬六千圓此項節
省之故係由裁減工人也一經理官產經費銀上年三萬圓本年
同一關口巡兵經費銀上年二百八十六萬九千三百九十五圓
本年節省銀一萬零三百六十八圓一房租官房修理費以及一
切雜用銀上年七萬二千五百四十七元本年節省銀三百八十
六圓一刷印稅單費銀上年一萬三千三百圓本年同一上屆不
敷銀三十二萬一千一百三十圓本年節省銀二十三萬九百二

十八圓一費難多坡島經費銀上年一十三萬一千圓本年同統
計宗室項下本年節省銀二十萬圓國債項下本年多用銀三百
六十八萬三千一百三十三圓上下議院項下本年無可節省津
貼收回賜產項下本年節省銀四萬一千一百九十五圓恩俸項
下本年節省銀二萬二百四十圓首相衙門項下本年節省銀三
十二萬二百六十圓外部衙門項下本年節省銀七萬六千八百
五十四圓刑部衙門項下本年節省銀六十四萬二千六百四十
一圓兵部衙門項下本年節省銀一百三十五萬四千三百三十
六圓海部衙門項下本年節省銀二十八萬一百一十六圓吏部
衙門項下本年節省銀三十三萬九千九百四十圓農商工學部

衙門項下本年節省銀二百八十一萬三千六百七十二圓戶部
衙門項下本年節省銀六十七萬二千三百九十二圓費難多坡
島經費無可節省統共節省銀三百零七萬八千五百一十三圓
二十六日晴中夜雷雨

朝鮮代辦李承壽來見告以帶見外部飾辭推卸未便相強聽之
而已 查日國入款身稅卽人稅分別貧富以定等差別焉二則
第一則分十一等每年進項在六千圓以上者納稅銀二十圓以
次遞減至第十等每年進項不及一百五十圓者納銀二角其婦
女及無職之人下至僕役亦納一角極貧者不能免惟以乞丐度
日者免之第二則則視其所居之房屋亦分十一等其所居之

房每年值租銀一千五百圓者爲一等納稅銀二十圓以次減至第十一等其房租每年不值銀十圓者納稅銀一角苟非居無房屋皆有應納之稅則倖免者希矣紙牌卽賭具收稅至重河稅則於可以行舟之河道凡舟楫往來均視其大小以征稅城稅則按日用之物納稅凡陳設之具以及車馬下至貓犬亦征之呂宋票章程每月一萬號每號收銀五十圓共收銀五十萬圓派定中彩之票計五百十三號應付與中彩者共銀三十五萬圓尙餘銀十五萬圓卽爲入款每月於本國中國小呂宋各開一次如號數不敷則下月可增數千號如號數積滯則下月可減數千號近行銷日廣有增無減故入款亦遞增焉

二十七日晴有美午刻發熱子刻始退

美國整頓海軍製礮造船已有所益水雷一物近始造成業經試驗可用惟其中奧妙精微非熟習有素不能得力茲於紐鉢埠創設水雷學堂以便訓練云 因按水雷種類甚多有伏雷送雷行雷之別而茲三類者又復分門別類考究甚易而施用甚難其自轟與轟人分別祇在呼吸之間較之施放炸彈其難不啻百倍非專門名家練習有素斷不能適於用也因嘗乘舟長江見網魚船呼之使來買魚論價久而不定當因船乘風破浪之時且行且言漁人櫂舟並行兩手按槳其船行遲速與我船同而又近不至觸離不至遠進退左右毫不費力古人所謂得之於心而應於手者

漁人實得之於手而無須用心竊意用水雷者手法之熟能至如此則百發百中百戰百勝矣專設學堂訓練其知此意乎

二十八日

晴天氣亦轉和平

內人等及有泰有美附火車於已正啟行赴金山 美國設水師學堂造就人材安拏報利埠最多近來每年挑選聰穎子弟學業有得者給以經費赴歐洲各廠學習造船駕駛等法博採兼收以求集益本月已派四人啟行矣 因查船廠以英爲多商船兵船亦以英爲盛商船盛故富兵船盛故強海軍之勢誠爲地球第一縱橫莫當顧其陸軍實不逮俄俄於印度陸路可通卽陸軍之力可及何以覬覦有年而終未嘗加兵印度自因窺之則仍畏英水

師之強而不敢妄開釁耳俄如加兵於印度未必唾手卽得而海軍之分散各口者必爲英船所傷此可慮也美國雖富而水師不強上年頗爲英義兩國所迫脅急於講求蓋不甘受制也

二十九日 晴中夜雷雨

初五日巴黎來電言俄德二國商訂通商條約業已多時迄無成議而俄法訂約歷時未久已各情願昨日兩國議約大臣均已簽名自一千八百五十九年以來於今三十四年俄法通商此爲第一次約云 因觀於此而歎立約之難也兩國立約其措辭皆言兩益其用心實利己而害人惟強與強遇則熟審兩國所獲之利足以相當而後允准否則不從如現在俄與法德立約是也若一

言 卷一
弱一強則利必歸強而害必歸弱此不可枚舉矣甚至有不諳他國強弱之勢而誤以弱爲強甘受其制而因受其害者則洋務之不可不明也居今之世苟能閉關自守不相往來誠爲至善而必不能者則強國之迫脅故也彼何爲迫脅哉則用心可知矣

六月初一日 晴戊刻雷雨

謁梅律師 美國近年布置海軍不遺餘力曾屬梅律司訪查現在兵艦共計若干水雷若干兵弁若干昨日始查到卽飭繙譯譯出因記其略計二號兵艦十一艘最巨者容四千六百噸馬力一萬零六十四匹最小者容三千噸馬力六百八十匹三號兵艦三十艘最巨者容二千七百噸馬力九百六十匹最小者容一千零

二十噸馬力三百六十五匹四號兵艦六艘最巨者容九百三十噸馬力三千七百九十匹最小者容四百二十噸馬力四百二十六匹以上兵艦共四十七艘水雷三艘大者容八百噸馬力六百匹次者容一百一十六噸馬力一千七百二十匹又次者容三十一噸馬力三百五十匹尙有動工而未成者二十三艘內容一萬噸以上者三艘馬力過二萬匹者二艘水雷一艘均於三年內次第告竣官員自提督以至糧臺共九百五十一名又美水師部收到定造之水雷正在分發各艦備用而水師人員諳習施放水雷者其人甚鮮水師部大臣卽通諭水師人員擇年力強壯者分班赴紐鉢埠學習施放水雷之法每班六人十日更換周而復始因

聞諱疾者難愈諱亂者難治諱其短者難濟誠哉是言也英地僅三島短在版圖乃興海軍以長駕遠馭而屬地徧五洲俄地處極北短在苦寒乃練陸軍以蠶食鄰封而拓地之廣至居地球六分之一德間於兩大短在倂介乃創通國皆兵之法而俄法皆不敢覬覦日本大將軍擅權短在守府乃收回太阿之柄而國勢遂振此已然之事也日斯巴尼亞入不敷出短在貧匱乃開源節流而國用以足美僻處墨洲同洲無敢與競者而歐洲強國好迫脅之則短在海軍頻年興造戰艦戰艦具而鮮能施放水雷之弁則短在水雷又興水雷學堂分班以練習此本年之事也人莫不有所短知其短者尙不乏人而去其短者卒鮮此強國之所以不多也

初二日晴戊刻大雷小雨

伯林來電五月初三日德王昧爽而起馳往保山埠直入駐防該處之營自稱勞軍領兵各員不知德王之來未能豫備迎接然於兩刻之間各營兵弁均按隊排列行伍整齊軍容甚壯德王閱之甚喜慰勞有加云 因聞天下雖安忘戰必危德王誠可謂不忘戰矣澠池之會秦王知趙有備而不敢動兵田悅假道於薛嵩薛嵩曰毋妄言吾有以待爾田悅遂止前此法耀兵於德界德前王遣人語之曰師丹之役貴國其將報復我乎請待君於來因河上俄之於德於英其德於俄均不諱戰不知者以是爲啟釁之媒其知者以是爲止戈之策也蓋觀其所行而知之二十年來各國之

兵無有敢加於強敵者但聞日本縣琉球法滅越南突尼斯河米
英滅緬甸俄滅浩罕基窪布哈爾殘破土耳其歐洲諸國分裂阿
非利加洲太平洋諸島國爲英法德所踞而已禮記所謂強者脅
弱衆者暴寡智者詐愚勇者苦怯兵法所謂攻其無備也則備之
不可以已也德王誠知所備哉

初三日晴

外部大臣訂見至則有紐阿連省人名綏法山外部大臣介紹握
手言將來使館晤談因允之又阿利干省律師於前月十六日來
電言有華人六十五名乘船潛入美境爲稅關巡差所獲搜其船
載有煙膏華人均無護照乃沒其船入官查拘船主歸案定罪而

船主已逃逸華人不能登岸又不能乘原船而返且無人供給飯食請速設法因卽請梅律師往見戶部戶部隨電該省飭令據實函覆昨日覆到卽咨外部外部故訂晤商葛禮山曰日本大臣言不拘拏監禁驅逐華人此等華人卽在蓋力例所定拘拏監禁驅逐者地方官已不肯行顧華人輒以資糧俱絕爲辭美政府安能給以川資供其衣食貴大臣旣爲詰問請作如何處置因答曰華人旣帶煙膏非盡落魄之輩應由地方官查明可入境者准其入境不可入境者令其折回勿令進退維谷葛禮山曰華人無便船載回亦無去志又無護照入境不能去又不願除非貴大臣出資給其衣食爲之籌資派員押送出境方不失所因思此事萬不能行

川資一項約銀四千五百餘兩尙可爲措派員押送如其中路脫逃嫌於失信且似同謀又此例實不可開華人之由卡拏大各處潛入美境者每年七八千人卡拏大政府每名收身稅銀五十圓歲至數萬以後如均由本使館送回其費需銀五萬兩安能爲繼遂答以中國本不准華人潛入美境且貴國開議院在即請熟籌之給資押送一節應毋庸議葛禮山頷之遂辭出

初四日晴

拜發奏摺各國戰船均外設鋼甲以禦礮彈惟船底及入水之處往往以礮彈所不能及而無甲近日水雷之用卽專自船底及入水處蟄發以價數千兩之水雷而破數百萬兩之鐵艦一轟卽碎

卽貧弱之國亦易購置設防美廷現查防水雷之法惟有以鋼網
圍船如君水雷之來但觸鋼網則不能入茲山水師人員於紐鉢
埠試驗鋼網用法云 因按古語云亡羊而補牢未爲晚也先儒
呂坤云人生最追悔者既往最悠忽者現在最希冀者將來三念
循環而畢生無自新之日矣蓋既往卽昨日之現在也將來又明
日之現在也現在悠忽則畢生悠忽而已矣日月易邁秦穆之所
以憂心也美國前此之忽於海軍其追悔宜矣而現在者不肯悠
忽故增鐵艦建礮臺作育水師人材派員赴歐洲船廠學習試鋼
甲造水雷驗鐵網設立水師水雷學堂堂皇皇焉如不及可謂知所
急矣詩云迨天之未陰雨徹彼桑土綢繆牖戶其斯之謂與 西

正金山來電言眷屬於卯刻抵金山均平安

初五日 晴午刻雨仍晴

梅律師來言華人由英屬可倫比亞倫入美境事又言該省居民多業捕魚向例不准客民攪業近來中國日本民人寓該省者未滿三年卽向地方官領入籍之照以便捕魚土民生計已爲所奪又該省裝罐魚公司三十二家所僱工人均係中日兩國之人士民憤怒聚衆公議聯名呈請議院禁止客民攪業云 因按入籍之利大矣寓美華人前此之不入籍者誠失計矣可倫比入籍華民與土人攪業土人雖嫉惡之不能效美國之燔逐也僅求議院禁其攪業而已議院亦未必從也或挾其未滿三年之短則地方

官分任其咎地方官亦未必認錯也入籍之異於不入籍者此也
初六日 晴未刻雨仍霽

南墨洲各國近年外憂內患相尋鮮有久享太平者各國憂之力
思補救茲威內薩可俞比厄瓜多三國擬共聯盟一國有事則兩
國相助以期弭患云 因嘗言近年弱小之國難以圖存此足徵
矣南墨洲之國除智利外均不能自立內憂可平而外患難弭也
英法商人隨地皆有開礦鐵路諸務多爲壟斷固已攬其利權矣
阿鎮丹僅爲半主基阿拿已屬英尼格拉鐵路全歸英人祕魯鐵
路古阿挈歸英商收三十年利權既去而名號空存猶人之精氣
日亡而軀殼安能久耶且非僅南墨洲已也歐亞阿三洲之埃及

希臘波斯阿富汗暹羅磨洛哥諸國莫不如是卽葡萄牙土耳其將來亦必如是亦如春秋之世將變爲戰國僅存其強者大者而已

初七日晴

大西洋運載之利向爲歐洲商人獨佔美不與聞自本年春初美國設立公司自運書信及人貨來往大西洋貿易日盛美商見有利可圖又在克蘭布船廠添造巨速輪船五艘每艘計銀二百萬圓冀與歐洲各商共大西洋之利云 因查地球各國商船以英爲至多次則美次則法又次則德而富之等差亦如之瑞典那威瑞士比利時版圖雖狹而商船頗多故其國亦富亞洲之日本其

版圖抵中國十之一其民數不及中國十之一而入款及中國之半則以其商船之多也萬國公法內江人貨不准外國商船駛行運載用意至深中國則一視同仁無分畛域不屑言利而利之漏卮者遂多否則以中國民數之衆甲於地球方輿之廣過於德法美三國何至入款尙不及三之一哉

初八日晴

法得越南未十年今又與暹羅搆兵暹羅自知力不能敵特派專使於五月到美求美排解美外部以爲法暹搆兵美居局外若兩國均願局外之國判斷美國自可代爲調處茲僅暹羅一國相求而法國並無願請調處之意未便與聞云 因查法君拿破侖第

一加兵於日斯巴尼亞英人援之俄加兵於阿富汗土耳其英人亦援之此非同恤相惡之義實爲唇亡齒寒之憂也顧智利加兵於玻利斐亞而祕魯援之幾至亡國則唇未亡而齒先寒矣美於亞洲無屬土向又自守安肯顧暹羅而有求於法哉然暹羅版圖本小加以喪師失地國幾亡矣暹羅立國已千年可謂舊國自輪船暢行涉歷重洋如履平地海軍之強者威加於數萬里之外遂使弱小之國不能自存風氣如斯可勝慨哉

初九日陰辰刻小雨仍霽

法國近日造成水雷船一艘命名蘭士克訥長英尺十六丈五尺四寸寬一丈五尺八寸入水四尺三寸容一百三十八噸有雙螺

輪馬力二千八百匹水師部人員已於五月試驗每一時辰能行六十英里云 因按每一時辰船行六十英里合中里二百里每日行二千四百里可謂速矣水雷效驗惟聞南北花旗交戰時北花旗曾以水雷轟破南花旗戰艦智利祕魯之戰祕魯鐵艦閣淺而敗非敗於水雷也近來各國競事水雷而究未試其效不過鬪智鬪巧戰勝於製造而已此近時風氣也戊正接上海口電云欽差從官眷屬跟役共八十二人附加力來美請照會美政府莫初十日晴

撰照會送外部 五月十四日巴黎來電言法人名土耳其賓創造新式軍器一種能轟礮臺各國現在至堅固之礮臺亦難抵當擬

請國家試驗後給予執照俾得專業出售云 因聞英國造重二百噸之礮試驗之時能洞厚一丈八尺之石壘直穿而過力誠猛矣然未試以鐵甲尙不知其能穿鐵甲若干尺也俄國克龍斯達的礮臺鐵甲厚四尺八寸前此英法各國合力攻之不破今法人新造之器以爲至堅之臺尙難抵當則俄之礮臺失其固矣或者今之炸藥其力甚猛有同是藥而力加至四十倍者若以此藥入彈內深入鐵甲一尺然後發炸因并所未入者而亦炸裂其理尙可信也

十一日晴

阿非利加洲之南各國多歸英國管轄保護有脫蘭威士國者產

金最饒和闐人先到英人以保護爲名踞其全土每月所產之金
值銀二百萬圓其約翰尼士堡地方六年以前不過屋舍數間自
開金鑛後人民麇集現有八萬餘人鐵路日興地方日盛又相近
之金布地地方每年所出鑽石值銀二千萬圓云 因查現時金
價較二十年前增至十分之五或以爲銷耗多而出產少使然非
也金之出產非少乃外國以金爲錢用之者太多耳鑽石之價又
數百倍於黃金外洋婦人首飾不尙珠玉而尙鑽石其質之剛無
堅不破鑛之堅而難開者恒用之其洞石也如錐入木而鋒不磷
蓋天下之物無有比其堅剛者矣

十二日晴

伯林來電言德主前欲添兵議院阻之遂散議院飭國人再舉現已舉定各議紳中以添兵爲是者二百五人不以添兵爲是者一百九十一人將來可添兵矣 因按德國地勢東連俄西連法俄法皆佳兵之國而法與德又有深讎法與俄且已聯盟不待智者而知德國所處之地爲危險矣歐洲名人盱衡時局莫不謂各國必有戰事而晏然者逾二十年因默揣今日之勢而歎歐洲之難久寢兵也各國兵數日增餉項亦日增雖相持莫敢先發然餉實難於久籌爲戎首者當在俄法英如不牽掣法國德國恐難支持添兵之舉實萬不可緩者也

十三日晴

伯林來電言俄德兩國商訂通商之約久而不成其故以俄國政府意存窺伺以爲壟斷如德議院終不允添兵則德國君臣必生畏意既有畏俄之見則於通商之約必有就俄之心俄人可以多得利益今德議院既願添兵德國君臣無庸存畏俄之見決不就俄俄人亦知之因請和衷與德商訂此約云 因觀此而知立約之難也弱國之受強國壟斷不待言矣卽兩強相遇而其國勢稍有等參卽其存心隱有區別如俄德二國是也德不添兵則勢不敵俄卽不得不畏俄畏俄而俄人卽因其畏意之心以行其壟斷之計所商之約苟非俄之得利十倍於德俄必不允行也德既畏俄又不得不讓利於俄而歸害於己也一時讓而時時如斯一事

言 卷一 三
讓而事事如斯以後與他國立約他國亦以此心相待而立約遂
無平允之日殊可危矣德既添兵俄亦就範幸哉

十四日晴未刻暴雨仍霽見日

伯林來電言俄德兩國通商條約未成之故因俄國稅則所定入
口之稅分爲兩種一種稅輕一種稅重而稅重者多係德國土產
此俄國之爲挾制德國起見也德國既無可避亦無可駁惟有設
法抵制報復而已 因按此俄之有意苛待德國也德國土產不
能不入俄國行銷則無可避稅則爲各國內政權由自主而非他
國之所能干預則無可駁所可能者惟有抵制報復而已竊嘗綜
觀各國交涉之道膠膠擾擾數不能終筆不能罄一言以蔽之曰

抵制報復而已其不敢過於苛待人者防人之抵制報復也其不畏人之過於苛刻我者我可以抵制報復也兩念循環而交涉之道庶幾持平此道廢而交涉不能持平不能持平而事事棘手矣十五日晴

美國農部大臣爲整頓本國農務特派專員赴歐洲察看各國情形查美國土產五穀乾肉菸葉各物本國用之不盡必能出口行銷方不致棄於地亦不致賤而傷農云 因按世常謂外國逐末而忘本其言不盡然也英法各國地狹人稠無可務本自不得不逐末耳若俄與美曠土尙多自應務本故二國運出五穀爲至多古人謂穀賤傷農知其傷農必思所以調劑之法非空言可調劑

也美可謂能調劑矣爲之疏通轉運出境卽以羨補不足之意也而彼此均獲益矣嘗考地球之上穀價之賤首推越南暹羅計銀四錢易米一石由其商務不講商船全無故運載出口之利全歸他國而穀之價又爲他國所壟斷宜其貧也

十六日晴

上月奧國政府派員來美查美國火車鐵路辦法現到華盛頓言奧國火車鐵路歸官辦者計六千二百餘米商辦者計七千四百餘米扣至一千九百五年則全歸官辦矣又言美國火車鐵路造法工料精於歐洲惟保護人命則遜歐洲各公司云 因查奧國疆宇四塞皆不近海頗與中國之雲貴陝甘相似故輪船少而鐵

路多合之中國里數蓋四萬五千餘里矣製造各廠火車鐵路不盡山官而與民同之歐墨兩洲風氣皆然匪僅奧國至於美國火車之保護人命尙遜歐洲上年美總統諭議院文已切言之則美國亦已自知所短當必設法以求盡善而奧員亦可爲留心者誠不辱君命矣

十七日晴

倫敦來電言埃及國常有英兵駐守情同英國保護惟其國王自以爲土耳其藩屬按年納貢不甘爲其所制請土耳其國君派兵至埃及以抵英兵並請土廷告於英廷撤回英兵並英國駐土之公使云 因論之曰埃及國王誠可謂昧於時勢者矣其先貸英銀

日

記

卷十五

六十六

四萬萬餘兩但快目前之揮霍不顧以後之債臺此最失計者也
自此以後國君之廢置各部之更代利權之操縱悉由英人蓋太
阿之授人久矣何忽然不甘受制而亟欲改圖耶且其所欲改圖
者不思自奮而冀援土耳其以抵英夫土耳其之衰弱仰庇於英
以求存非一日矣度土耳其必不派兵即使派兵亦必不能抵英
告於英廷請撤英兵英必不允不過多一番煩擾耳否則如石晉
之於契丹自速其敗亡而已

十八日晴

前葡萄牙人在日本犯法葡員不問日本遂照會葡廷以後葡人
犯法照日本例治罪葡國不照覆即撤回駐日本之領事官日本

亦不問此後遂以日本例治葡人葡國既知呵喝無益又以寓日之民歸日員約束有傷國體遂派澳門總督兼署駐日本公使赴日本都城與日政府會商約束葡民之法云 因以從前葡日齟齬而早料葡人之無能爲者今果如所料矣葡自稱大西洋國以呵喝亞洲而不知遣使以後亞洲早知其國勢也今猶虛張聲勢庇犯法之民而不問置鄰邦之文於不覆且撤領事以示絕交方謂日本必誠惶誠恐急轉圜矣而日本卽舉所告於葡廷者毅然行之葡人至此方知呵喝之全無用也於是設法轉圜派員謝過商議約束已民之法蓋黔驢之技窮矣孫武子云勇怯勢也強弱形也日本惟深知葡人之形故能因其勢而用之耳

十九日 晴已後小雨竟日

南墨洲威內薩國地當赤道炎熱異常各國輪船載冰往售行銷至多得利亦巨茲本年自設冰廠製冰以收回此項之利惟防輪船載來之冰攪奪故立新章凡他國入口之冰每磅征稅銀五分云 因查威內薩爲墨洲至小之國軍額甚微又無兵艦上年內亂至今甫平庫帑已空民力亦竭無法籌費僅向歐洲貸銀六百萬圓以濟急用度其兵力斷無以禦外侮無論何國兵船壓境均不能當而何以不畏敗壞而征向所未征之稅哉且冰之價值每磅售銀不過五分而卽征稅五分明苛斂各國詰責尤爲義正辭嚴彈丸小國何以堪此而毅然行之者則以稅則爲各國內政

也

二十日陰

墨西哥國近謀開闢興利而創火車鐵路開鑛無欸可籌現美英德三國之商代爲興辦自一千八百九十年正月起卽中歷光緒十六年至今三年之內德商共費銀六千三百七十五萬圓英商共費銀二萬一千三百五十萬圓美商共費銀三萬四千五百三十一萬圓英商以貿易耕植爲多美商以製造開鑛鐵路爲事云因於此而歎美英之富也亦於此而歎墨之貧也凡貧弱之國多以利權授人如歐洲之埃及墨洲之祕魯海代阿鎮丹等國是也利興於地以地權授人不啻以利授人矣當其授人之時或出

於不得已實有不得不然之勢所可恨者其先之泄沓自安於財之源流生之無道用之無節耳墨國前貸法國之債而失信不償幾於決裂故此次法商無過問者鑒前車也近向中國求准招工中國知其貧賤鑒其失信而立約嚴防之其庶幾無弊乎

二十一日晴

前法國博士都爾賓創造至猛之炸藥者近又創造大礮一尊堅利無比每一刻時可放四次彈子飛射計二萬五千枚礮臺戰艦均莫能當人馬更無論矣法國政府已派員查驗如果可用則法國武備天下無敵矣 因按凡礮之欲及遠者其礮身必長彈之欲洞堅者其彈必巨卽賈誼所言寬髀之所非斤則斧此一定之

理也今以一刻時而出彈二萬五千枚此卽卷筒群子格林礮之類用以守險防敵人之沖突奪隘可耳乃以爲能摧礮臺穿鐵艦未免張大其辭殊難信也

二十二日晴

倫敦來電言埃及國王不甘受英挾制擬往歐洲各國商請合力令英撤回所駐埃及之兵英國全不介意亦不阻止料其無用故也且大權在英廢立易如反手如必囑強則廢棄之或如緬甸哲孟雄等徑取其地而已 因嘗歎當今弱小之國漸不能自存也阿非利加全洲已爲歐洲各國分裂突尼斯布哈爾越南緬甸暹羅又爲英法俄諸國所滅十年之內滄桑忽焉埃及之將亡尙有

自取之道借英鉅款至銀四萬萬餘兩宜其受挾制也若阿非利加一洲與突尼斯布哈爾越南緬甸暹羅諸國實無可加之罪不過弱之肉強之食耳而埃及之亡且後於諸國者以有法俄牽掣之也英國布置周密之後他國所不能牽掣之時則必一舉而覆亡之埃及爲五千年自立之舊邦而亦不能自存此宇宙一大變局也

二十三日 晴已刻小雨

送上議院紳可六禮六色 歐洲各國馬牛所食之芻草歉收各國駐美公使多向美農部探聽芻草收成并其價值計上年收成尙豐價值計頓易銀自四十五圓至五十圓不等擬卽運赴歐洲

出售美國上下以歐洲飼畜無芻將來馬牛必難蕃息本國牛羊極多又可出口行銷云 因查地球各國美俄均重農事美之地氣溫煦較勝於俄故農務亦勝之青草一物各國皆歉而美獨豐因留心農事故也以每頓一千六百磅折爲一千二百斤售銀五十圓則百斤可售銀四圓較之中國米價已兩三倍矣農人以一畝之地生草即可溫飽以十畝之地生草即可富家衣食易謀宜各國之民趨之若鶩也

二十四日晴

北墨洲之紐芬蘭向爲法屬後爲英屬兩國漁船往往以爭界起釁法政府特派水師提督挨拉磨納帶兵艦往察情形與地方官

商令和洽以息爭端於五月底抵紐芬蘭地方官以六月初係法國改爲民政之期訂以設筵具樂相款而同時適有法商運貨入口匿稅致被稅關充公該提督爲之求免稅關不允遂不赴席起旋徑去而英國所派兵艦適到亦不挽留云 因查地球諸強國每以盛氣凌人皆好勝也施之弱國固受之而不言卽施之強國亦不虞決裂者勢相當也勢既相當終以敷衍息事而已近三年中如祕林海峽一案英美互拘漁船法拘英之漁船俄拘美之漁船是也俄德兩國之君不諱交戰法於德不諱復讐德於法不諱再戰義於美爲紐阿連之案不諱絕交而終無戰事者兵力相敵不敢操必勝之權也弱國出之禍不旋踵矣然則公法何足恃所

可恃者必在自強

二十五日 晴中刻雨

倫敦來電言英國派兵駐埃及實非得已因埃及形勢爲英與印度往來所必經之地如英之門戶也且蘇彝士河已爲英之產業如爲他國所據則英與印度隔絕印度不能保矣埃及之兵決不能撤法與土耳其雖屢詰問決不能從如埃及國王爲難廢之而已無他策也 因讀湯誥至推亡固存讀史至逆取順守未嘗不歎興王之所見略同也孔子曰裁者培傾者覆聖功王道一以貫之矣埃及蹈爲傾爲亡之機英人爲逆取順守之策故於印度則固存於埃及則傾覆雖似霸氣實合機權然非綢繆之早不及事

非兵力之足不能行越之沼吳也教訓二十年德之報法也練兵十餘載英人謀埃及暨蘇彝士河深心遠慮尙不止如斯矣

二十六日晴

卯刻率參贊隨員等恭行

朝賀禮辰正設麪中正設讌

初三日比利時來電言比國創國

例不言管轄屬邦之權惟阿非利加洲有孔果國者爲比屬國業已多年茲議院擬立新例以便管理屬國與各大國一律云

因

查孔果一國與桑給巴爾接壤版圖甚廣商務尤盛國中鐵路四通八達有方輿之氣象比國得之如設施有道可與英之印度比肩蓋外府也

張領事曾詔山紐約來

二十七日

美國公司開辦尼格拉孤河道興工業已數年所需用項爲數甚鉅均由該公司籌欸接濟近因金銀價值相懸太遠銀根遂緊竟致無法籌欸所刻出借券無人承受經費遂竭不得已停工矣因查美公司所開尼格拉孤河道卽巴拿馬界分東西洋之地也法人勒伯西往年開歐洲之蘇彝士河達地中海商船使之獲利甚鉅遂以其術試之巴拿馬費銀數千萬圓工不成而中止美公司乃於相距不遠之尼格拉孤國興工開挖冀奪其利而享其成茲又以費絀而止豈天之限東西洋不欲人穿鑿耶因於光緒十七年赴祕魯時途經巴拿馬由西洋至東洋必踰陸地而過舍舟

登車約行兩時許計近百里洋人所言二十八里者蓋英里也以
百里之峽而以人力開通古人所謂愚公移山者不過寓言今乃
目見之焉 照會美外部請奏總統諭議院再議蓋力新例又託
議紳設法參贊彭光譽偕繙譯容揆赴希卡果

二十八日晴

羅馬來電言銀市日壞義國國家銀行倒閉政府查出議院有受
賄之事上議紳受賄者計一百二十名下議紳約一百人此種議
紳爲公論所不容必迫之出院云 因按自上年以來金價日漲
而銀價日低各國銀行紛紛倒閉至今尙未已也美國銀行章程
一律用金得拉 卽金錢凡數及一百圓者收銀之家非金得拉不

收其銀錢僅用以計奇零之數耳自金價日昂而美國金錢之出境者上年計值四萬萬圓今年庫中所存僅一萬萬圓以償銀幣有絀無贏而銀根遂爲之緊矣使館滙銀爲經費光緒五六年陳任時每庫平銀一萬兩收美銀一萬六千餘圓自光緒七年至十一年此五年中由一萬五千餘圓減至一萬二千餘圓自光緒十一年至十五年又由一萬二千餘圓減至一萬一千零五圓自十五年至今中間偶有漲至一萬二千餘圓者然爲時不久今竟減至九千圓且不滿九千圓由磅價之日高故也

二十九日晴

美國前駐巴拿馬領事來謁云此來專爲叩謝中國

言 卷一
皇帝賞給寶星之恩數年以來極力保護商民冀以圖報此次卸任中國商民扶老攜幼送行者數百人多至泣下已亦爲之垂淚又言該處政事不修官府不知惠遠現在總督尙能保護華商以後亦不可必上年華商被土人公司賒借銀至九十萬圓至今倒閉正當控追又言美現任總統及外部之意甚不以蓋力所創之苛例爲是將來或可望廢因均謝之欸以茶果是晚卽往答拜并贈繡巾一盒細茶二瓶明日卽附火車回本省矣

三十日

外部衙門遞到前駐巴拿馬總領事阿丹信來函卽飭繙譯譯出云敬呈大清欽差大人閣下前荷

大皇帝恩獎賞給二等第三雙龍寶星一顆並牌照一道阿丹信
昨日已親赴外部恪遵

旨意恭謹拜領矣伏查牌照內敘阿丹信前在可俞比國巴拿馬
埠任內曾經料理華人事務因此故給予獎賞等因竊思阿丹信
不過稍効微勞乃竟辱承

貴政府垂念及此以致膺茲重賞殊出意外實屬榮幸之至感激
奚如惟所歉者以時事之變遷不克聯任再効馳驅上以報

皇仁於萬一下以振興華人之利益耳惟祝大人福壽康強是所
切禱肅此謹請代達六月二十八日西歷八月九號阿丹信押因
觀美外部及領事待巴拿馬之華民而知美國上下之惡華人非

其本心也中國於外部求其公使領事之駐可俞比巴拿馬者保護寓居彼處之華民既慨允矣而又於因之行爲作書以先容若唯恐其與因不浹洽而保護之不認真何其誠也領事阿丹信於巴拿馬土人之妒華人微有形迹卽爭於地方官必使土客之勢兩平又何其誠也今阿丹信言其回美時華民相送而依依不捨者數百人彼亦爲之墮淚古所謂循吏愛民與民之愛上何以逾此然則華人非工黨之妒美官紳非求工黨之保何至於譏禁哉

出使美日祕崔日記

七月初一日元吉 晴未刻雷雨

伯林來電雲德國政府近接俄國來信謂俄將調海軍一隊赴德國之都倫海口暫泊然後直往地中海之東岸各處遊弋與駐該處之法國海軍聯兵遇事相助以敦俄法友誼云 因按此必爲法與暹羅構釁而欲助法以制英也夫前事之不忘後事之師也法人窺印度則英以水師中途要之俄人攻阿富汗則英以陸軍遏之英人攻美則法與和闐脅和以止之所以防鄰愈厚而我愈薄也今法急圖暹暹不敵法必滅於法暹滅而法逼緬甸則印度之西多一強鄰此可危之勢英之所欲爭也英海軍勝於法可以

阻法人之兵力使不滅暹否則亦可瓜分尙不失便宜也今俄助
法則英之海軍以一敵二遂不能當法人庶可得志於暹得志於
暹則英屬印度之地東偏於俄而西偏於法或可以望瓜分乎

初二日晴

伯林來電言接本國駐土耳其公使信謂土耳其國君以埃及國
王將來覲見不過以待屬國之禮過之其請派兵挾制英國不過
却之斷不從并救人云 因按埃及立國四千餘年可謂舊矣初
屬波斯繼屬羅馬終屬土耳其中間惟拉墨塞一朝差能立國其
餘皆依人以存如宋之南渡後耳今其勢將屬英雖有善者亦無
如之何矣況其全不審彼己之勢耶大抵不能自立者其弊徂於

苟且偷安印度亦然未聞其有人才奮起也

初三日晴

巴拿馬來電言南墨洲之基阿拿國英屬也近日查得其地產金最多較美國之金山英國之新金山及所屬之阿非利加洲之金布利國尤多各國人民現赴基阿拿開礦者絡繹相繼云 因嘗聞人言美國產金英之屬地多產金宜其富也顧南墨洲亦產金阿非利加洲亦產金何以不富而貧澳大利亞卽名新金山產金至多而自古至今土人不聞開礦乃留以貽英人然則天地本有自然之利必得其人而後興耳今歐洲之國多巨富而德國以外不聞產金其故何也嘗讀蠶婦詩曰君看羅綺者不是養蠶人言

商之奪其利也然利權之操於商豈僅中國爲然哉地球蓋莫不然矣

初四日晴

伯林來電言德主志在添兵盡力設法新舉議紳到院會議僅數日卽議准德主大喜卽飭散院不必久羈聞此舉專賴首相卡布威推誠襄助之力云 因查八十年前法主拿破侖第一雄才大略已霸歐洲稱爲日耳曼帝普國之君與戰三次不勝而割地終合俄奧瑞三國破拿破侖入巴黎斯廢拿破侖流之荒島二十年 前拿破侖第三不許普國王族王西班牙貽書詰責普君整兵會戰亦虜拿破侖而入其國都百年之內法國兩君皆辱於普然則

法與德固世讎也志豈須臾忘報復哉查第一次歐法之軍俄普各國共一百萬而英軍之守西班牙者尙未計焉第二次之軍僅普一國卽五十萬是其所以取勝者固在兵精而尤以多操勝算矣德主添兵之計誠非得已蓋觀於往日之戰而知之 新使楊

抵金山

初五日 晴中夜小雨

伯林來電言德主偕其后乘官輪由啟爾埠頭赴瑞典國與其國君相見云 因按啟爾埠頭卽從前德法構兵時法國兵艦至此以爲天險不攻而退者蓋據形勝之全者也於此知興築船埠之宜度形勢焉瑞典與那威地近北冰洋古之所謂使鹿使犬之國

者似之八十年前法主拿破侖第一殘破歐洲英俄普奧各國合縱以敵之瑞典亦與焉然則瑞典雖偏小其武備亦有足稱者德主以聯盟之局奧志不堅故欲糾合日斯巴尼亞與瑞典諸國以壯軍威今之往瑞典者必爲此也君子曰備豫不虞古之善戒也德主有焉

初六日 小雨

倫敦來信言接加爾格搭信法以兵力凌轢暹羅暹羅自知不敵求印度相助並接濟軍械印度政府不允告以如暹羅願屬英印度方允行云 因營料暹羅難於圖存今果然矣查暹羅近年以來頗結好於英且易歐洲服色自以爲可無虞矣而不知并吞之

風氣已開弱小之國斷不能久東周列國之時滕文公宋王偃皆有志振興者而終於不祀此前車也歐洲小國現尙不致滅亡者以各大國之勢均力敵相爲牽制耳將來勢有不均力有不敵一國發難而旁觀袖手如今日之亞洲則小國將必不免卽大國之凌替者亦終不免發難之國共在俄乎次則英也 電金山詢新公使楊帶若干人赴華盛頓應需客棧房若干

初七日晴

謁外部初坐定葛禮山卽言赴外埠昨日始返始見照會議院雖已開現議銀價事紛紜難定必俟此事議定後方能及外交也又言近晤各議紳向之以盡力新例爲是者今皆不以爲是蓋見例

不能行皆有轉圜之意將來當可議廢否則屆期必不行也因謝之因言中國新使楊公已抵金山不日可到美都見總統遞國書總統避暑未回故先於貴大臣處查問葛禮山曰總統近得疾醫者謂宜避囂靜養故暫居鄉僻處十餘日內恐不見客矣應請稍待又詢暹羅事又詢中國兵制因一一告之談久而出

初八日晴

查光緒十八年中日兩國互市日本入中國貨物值銀六百三十萬兩較上年增銀五十餘萬兩中國入日本貨物值銀一千二百萬兩兩相比較中國實多入銀六百餘萬兩商務漸盛矣因查十年以前日本兵船勝於中國故有臺灣之役日本商務亦勝中

國中國招商局輪船初到日本日本畏奪其利卽肆詆毀今閱十餘年商務軍務已駕而上之者何也中國地大物博向也不言功利一變計焉如有本原泉擴充固易甚也日本之功效如邾夫人所言傾囊倒篋而出之者本難爲繼也楚莊王謂鳥不鳴者鳴則驚人秦西以中國爲昔睡今醒似有合焉

初九日陰

比利時國來電言本國議院紳士向來無俸惟不居都城者每月有俸銀四百二十三佛郎茲改章程以後無論所居何地每年均給俸銀四千佛郎其不居都城者則來往車費一律免收以示體卹云 因查比利時向合和闌爲一國以後分爲二國其國版圖

甚小而商務實盛且歐洲各大國皆認爲局外之國故無兵事而民數易增國儲亦足其議院紳向例無俸則歐洲各國類然日斯巴尼亞是也卽英議紳之俸亦甚細微此足證矣其不居都城者每月給銀四百佛郎僅值銀八十圓以供火車之費而已今一律給俸每員亦僅銀八百圓蓋比與德鄰國小而儉無侈靡之習故用易給也

初十日 大風晴

大西洋海介歐墨兩洲之間有羣島名阿梭爾向屬葡萄牙而距葡甚遠消息難達呼應不靈葡國欲創海電而苦無資近與英公同訂設海電由葡都達該島已立合同均簽押矣 因於是見葡

之貧也又於是見葡之失算也不自設電而以授人本國之利已漏卮矣彼固以貧而出此下策也度葡國之設電以通屬島之消息固防他國之佔其屬島而欲以是維持之也而不知將來佔此島者卽英也以英人佔此島而由英公司爲之告急其消息依舊不達呼應自必不靈甚且虛者實之實者虛之且聳島人以叛葡開門以延英皆意中事耳秦以杞子戍鄭鄭使掌北門之管而遂招秦以襲鄭焉此前鑒也 古巴總領事譚乾初到

十一日晴

俄國政府近立新例不准各鄉村人戶出賣產業與外國人以免外人侵并本國人失業云 因接此例有三善焉土地爲衣食之

源寶而守之可免凍餒一也外國民人入內地管產業土客不協易起釁端可以防之二也外國教堂尤易起釁彼不能購土地自不能建教堂三也一舉而三善備焉

十二日小雨

德國領兵官約束部下極嚴近有兵丁六名以爲太苦逃亡而入法界願隸法隊爲法効力法員納之遂訂合同飭赴馬賽海口附船赴阿非利加洲法屬地矣 因於此歎嚴之難行也少時治家尙嚴課讀尙嚴今出使亦尙嚴而頗有怨望者然子產嘗謂寬難武侯亦求法立明代戚繼光治兵至嚴其軍律實爲後人師法則嚴之有益也明矣德國陸兵天下莫強而約束極嚴可於此得治

兵之道焉其以爲太苦者乃不肖兵丁不受約束此亦人類中之必不能無者故法員雖知之而仍屏之阿洲其用意可想矣中國兵政以湘淮兩軍爲嚴卒平粵捻回匪之亂其明效可徵矣嘗過天津聞淮軍之延德國兵官訓練者頗苦其勞嗚呼此德國陸軍所以無敵也夫

十三日晴

巴黎來電言法國有事於暹羅俄國政府將派水師一隊迅赴暹羅以助法人而符聯盟之意英政府初有救暹之意茲見俄法兩國聯兵不便妄動矣 因按俄法聯盟之舉誠得計矣今猶小試其端耳而英已畏之孫武子云勇怯勢也強弱形也形勢不敵則

言 卷一
勇者亦怯強者亦弱今日之英是也因嘗論地球海軍之勢俄與法合則英不能敵今果形見勢絀矣因以爲此事初見端倪而尙非究竟也苟充俄法兩國大欲之所存全力之所及則歐亞兩洲必將有大被蹂躪者爲可虞也昔者拿破侖第一求合於俄而歐洲之不靖者二十年殺人二百二十萬非俄法之交中離英俄普義之聯兵合戰未易勝其殘也

十四日晴

瑞士國來電言美國與智利國賠款之案積至千餘起茲立約各派員秉公商辦以清積牘美派員名古德智員卽駐美公使名嘉拿瑞士派公道人卽瑞國駐美公使均在華盛頓於六月十四日

起議約六箇月爲期云又聞美與英祕林海峽捕魚一案歐洲公道人所斷美國理細將輸於英而美賠英之銀數頗鉅云 因駐美三年見美國所行多川霸氣禁工之事爲背約報施之約好佔鄰國便宜覬覦檀香山又違公法戕殺義國旅美之民而置之不理專祕林海峽之利而擄英漁船不獨各國譏之卽美之公正紳耆亦多譏之幸新總統外部均不直前任之所爲一一矯正或能收之桑榆儻舊主聯任布連不死則美國之禍未艾也夫

十五日

陰辰後見日

美報載今春各國兵艦來美賽會事竣後已星散惟俄艦尙留近陸續又到數艦合前所留竟成一隊其故因南北花旗爭戰之時

俄人無左右袒事定後美國曾派水師一軍赴俄言謝此次俄廷亦以相報云 因按此語不盡然也南北花旗之戰已二十年此時言謝則已遲矣且既欲言謝何不於賽會時聲明而於三四月之後忽爲補晨之雞乎大抵近日地球各國無不誇耀海軍以期威遠俄之水師近已強於往年祕林海峽一案俄人曾擄美之漁船美人曾力爭之俄人又漸欲蠶食墨洲故以是爲先聲之奪以後收迎刃而解之效耳 至阿林頓訂房公使一處上下三間按日銀六十圓餘分主僕主每日銀五圓僕每日二圓半如不赴餐房之饌而於本房飲食者另按人按日加銀二圓半如久寓至十五日以外價可稍減

十六日晴

中正接總理衙門電開十二日奉

旨崔國因補授右庶子欵此

暹羅來電言六月法人以兵船脅暹羅索美江以東之地又銀三百萬佛郎限於兩日內回覆遲則開仗茲暹羅已從命而法國使暹之專使又令暹羅撤退所延丹國人矣 因觀於此而知敵國之心焉因知謀國之道焉八十年前拿破崙第一之勝普魯士則限其兵數十年以前俄國之勝土耳其則索其兵船智利之勝祕魯則限以不築礮臺不添兵艦不購槍礮今法之制暹羅則限以不用他國人才查丹國卽瀛環志略所紀之噠國又名大尼日本

譯萬國史記以爲丁抹中國以爲丹麥五百年前向以海船劫掠各國爲生曾劫英人入貢後漸衰微蓋其水戰有足稱者法人防暹羅之蹶而復振故以是制之然則蹶而欲復振者反各國之所以脅制他人者而行之則庶乎其可矣

十七日晴午後小兩大風雨徹夜

是日黎明卽起設香案行三跪九叩首禮撰謝恩摺

伯林來電言近日俄國於德國貨物入口加抽稅銀德國政府現議報復所有俄國運入德國之貨一概加抽稅銀五成云 因按稅則爲各國內政例可自主而不憂其太過者則特報復一節足

以制之也蓋我國土產入他國之口稅之重輕他國主之他國土產入我國之口稅之重輕我國主之如交以道而接以禮則彼此均不爲賤削之事如有狡猾者必欲賤人以肥己則以其人之道還治其人固毫不費力也以各國自主之權而卒不至於太過者恃此也

十八日 大風晴

自美國創設頭等公使以來英法義三國已改駐美公使爲頭等茲俄國亦改爲頭等德國則另派公使更換 美公使之駐尼格拉孤者值尼國內亂都城接戰外攻之兵礮彈及使館幾於傷人美公使卽通知亂黨謂圍攻都城不先通知局外之國殊違公法

現電撥兵船一艘由祕魯至尼國以保護美國官商云 因於是而歎公法之不可不知也歐洲各邦論立國育才之道曰讀書則智不讀書則愚智則強愚則弱誠有味乎其言之也德國之民讀書者百之九十五美國之民無不讀書宜其強富如是之速也阿洲之民未聞讀書者宜其全洲爲各國所分裂而曾無一人一國出一成一旅以圖存也前智利之議院黨不直其君而不敢違公法以逆美國之兵船今尼國之爲亂者竟違公法以殃及各國之使館曲直不同則成敗自異智議院之事成尼亂黨之事其敗夫亥正新任出使大臣楊 到因率隨員迓於車廠至亞林頓客棧設案恭請

聖安談至子初返館

十九日晴

上月倫敦來電言歐洲如英俄德法各國其兵按年大操或一次或數次不等所以重武備也惟英國所重者不在陸而在水以其地勢四面皆海拒之於海陸自無虞今年水師部議以本國兵艦分爲兩隊以紅旗藍旗別之紅旗隊內鐵艦爲多藍旗隊內雷艇爲多作爲交戰之形以試鐵艦之於雷艇二者孰優孰絀且觀其進退攻守離合之勢以期精熟庶幾臨時有把握云 因嘗論俄之陸軍英之海軍皆天下莫強焉今觀英之所籌畫者而益信也八十年前拿破侖第一蹂躪歐洲各大國無不被靡惟以陸軍攻

俄則敗以海軍窺英亦敗其時俄人猶須堅壁清野英之三島晏然無事信乎拒之於海陸自無虞也孫武子云兵因地而制勝俄英二國之軍是也一百年前英之海軍尙有見挫於法日二邦之時近百年內則無敢與爭鋒者可謂無敵然俄德法義諸國日夜淬厲以增鐵艦而俄法又已聯盟此英之所遠慮者故訓練以備不虞也

二十日晴

前月馬得力來電言日廷擬改稅關章程不川銀錢而川金錢嗣以各國不允而罷倫敦來電言俄廷欲與奧國訂立報施條約先詢奧廷奧國允照最優之國相待但與義賽兩國之報施五穀入

口係格外利益則不能也 因按奧日兩國措施比而論之則奧勝日日改圜法暗中取利其名不順奧之咎俄以禮而有限制俄人難與強爭矣 因嘗論各國交涉之道其私誼甚優而公事不可假借奧君與俄世子之過境自任爲東道主人躬親迎迓下榻宮中意隆禮備而於報施之約所言公者仍公言之非忽然不欲結好於俄也不如是則各國之要求無所底止也 出使大臣楊

酉刻接印

二十一日 晴辰刻雨

美國費城新造成兵艦名明義巴利士長四十一丈英尺闊五丈八尺英尺喫水二丈二尺容七千三百五十頓馬力二萬一千匹

船身用鋼製成所裝之煤可行一萬五千米

合中里五萬里

其行極速所

以爲交戰時擄敵國商船之用也

因按歐洲各國以商爲本斷

無有不恤商者擄商船之謀所以遏敵國之輕易開釁也往年拿破侖第一禁各國與英通商英人亦禁各國與法通商由共兵力足相抗也中法越南之釁法以兵艦阻中國漕船無以抵制遂至竭蹙美國此舉其爲未雨綢繆也夫

二十二日晴

美國費城新兵船動工已命名布洛克林容九千一百噸馬力一萬六千匹鐵甲不厚而礮爲多蓋爲攻敵用也法廷新造巡船全仿美巡船名紐約之式蓋因法員見美紐約巡船船身之堅機器

之靈實爲利用故而仿之各國皆稱美之造船未逾十年而他國
卽有以爲師法者由其講求日精也美廷聞之亦自喜焉 因嘗
論美之講求水師苟充其力之所及十年以後可以敵英惟歐亞
兩洲絕無添煤之埠其所短在斯耳查船廠礮廠首在人材次在
物力非講求有素則無人如無師之學也非庫欸甚充則無財如
無米之炊也無人而借他國之人當起釁宣戰之時必不得力以
公法限之也此俄王彼德所以微服而充船廠之工也無財而貸
他國之財作剝肉醫瘡之舉必致終窮以漏卮累之也此歐洲各
大國所由以開闢利源爲本也 午刻謁見總統辭行總統許竭
力顧全中美交誼

二十三日晴

辭行出使大臣楊 至使館寄請

聖安美戶部查本年六月一箇月內出口之麪值銀一千五百九十一萬二千七百五十一圓較之上年六月多三百四十餘萬圓又查自上年七月至本年六月止此十二箇月內出口之麪共值銀一萬八千八百九十八萬一千九百二十二圓較之又前一年實短銀一萬萬圓云 因於是歎美國之能興利也麥麪一物入欸已近銀二萬萬元前年且至三萬萬圓可謂百姓足矣嘗讀漢書紀文帝之世太倉之粟陳陳相因至紅而不可食今則移食於他國合海外爲一家有無相通米粟雖多不置無川之地其謀國

也不可謂非計之得也世嘗謂古今人不相及豈其然乎

二十四日晴

午初啓行赴火車廠出使大臣楊儒參隨各員送行梅律師亦到
十五日金山來信言日本人四十九名由英屬域多利假道來
美稅關查得近年日本人之赴域多利者甚多此數月中混入美
境者已三百名均爲稅關阻回矣 因按美國禁工之令已行於
歐洲斷無不行於亞洲也惟歐人之入美境者皆直截而來亞人
之入美境者多紆折而入爲不同耳美外部大臣爲因言自銀價
驟變而各礦停工工人之失業者數十萬人遂致不靖每與地方
官爲難不僅與華民爲難也然則美實患人滿矣日本人尙欲入

境哉

二十五日隨

午正至希卡果換車於亥初開車 十四日俄國彼得堡來電言
俄國近日於開採金礦一事詳加考究故所採金數年有加增一
千八百八十五年所採之金值銀一萬四千羅卜至今未及十年
現在所採之金每年值銀三千六百六十餘萬圓云 因按中國
鑒於有明之季世視開鑛爲畏途遂至棄地寶而不取而爲高論
者或以爲罄天地之藏其立言誠大矣然當今之世羣雄角力我
如能閉關自守拒使不來若桃源之自爲世界豈非盡善而無如
不能也陸防之外又有海防禦船製械製礮軍需所費不止百倍

將何以籌資哉外洋開礦之舉未可盡非也

二十六日晴

昨日至希卡果換車因開車尙待五時稍至各處遊歷見石房至高者地面約十八層合之地下當二十層可謂高矣又至一處則銅鑄人像兩男像爲紫人卽美國土著之煙甸人也一婦人一小童像爲英人則二百年前初到美國者也一紫人舉斧以斫婦人另一紫人以手格之斧未下婦人則以右手入紫人腰際抽其短刀已將出鞘蓋欲奪刀以刺紫人也小童則駭極張口而號情神逼肖距銅像二丈餘許有枯樹一株無枝葉蓋當時之物已二百年生氣盡而未刪伐特留之以誌此事之顛末也

二十九日午刻抵金山黎領事等及商董相迓於火車遂入館署
八月初一日晴中華會館設席餞行

初二日雨昭一會館設席餞行

初四日午刻上槎那輪船眷口共五人何汝霖隨行領事黎等送
上船舟行向西每日約行一千二百至三百里甚穩